

MANATU TAIALA O IANUARI & FEPUARI : FAI SE AMATAGA FOU

E taua se amataga o se faamoemoe, aua a lelei ona gasolo manuia lea o fuafuaga uma. Tatou iai i lenei foi tausaga, amatalia galuega Aoga Aso Sa. O se taiala lea e tatou te vaavaai iai aua le amataga o lenei tausaga ina ia sologa manuia. O le faamoemoe maualuga ina ia avea tatou le fanau ma faataitaiga lelei e faia se amataga fou e le gata i totonu o lou aiga, o lau aoga, o lou nuu ma le Ekalesia.

ASO SA: 27 Ianuari 2019

MATAUPU: UA UMA LE LOLO

SINI: Ia aoaoina le vasega ia malamalama ina ua uma le lolo na iloa ai e Noa le alofa o le Atua ia te ia ma lona aiga.

TUSI FAITAU: Kenese 8:1 - 14

FESOASOANI MO FAIAOGA:

O le a le uiga o le upu Lolo tamaiti? Ioe o timuga,, a oo ina tetele timuga ona tatafe ai lea o vai. E faapena le mea sa tupu i le vaitaimi o le tamaloa nei o Noa. Ua masani tatou i le fesili poo ai na fau le vaa?. O Noa sa ia fau le va'a, ae na mafua ona fau e Noa le vaa ona sa fetalai ai le Atua o le a o'le lolo i le nuu o tagata agasala. O le tatou mataupu la o lenei taeao, o le a tatou talatalanoa i le uma ai o le lolo.

Faimai le molimau a Kenese – Ua manatua e le Atua Noa ma lana fanau ma meaola uma sa i le va'a. Ona aumaia ai lea e le Atua o le matagi ina ia mau ai le vai. Ua taofia le toulu mai o timuga, ua pupuni e le Atua punavai sa matalatala. Ua tafi esea le vai ma ua faaitiitia. Ona pa'ulia ai lea o le vaa o Noa ma lana fanau i luga o le mauga o Ararata. Ona tatala ai lea e Noa o le faamalama ole vaa na ia faia. Ua ia tuu atu le manulele o le oreva ua lele o ia ma ua fefoifoia'i. O lona uiga tamaiti e lei mau tele le vai. Ua faapena foi le lupe, na ia faalele muamua peitai ua le maua se mea e tu ai o ia, ona toe foi ane lea i le vaa. Ua toe faatali Noa i nisi aso e fitu, ona tuuina atu ai lea e ia o le lupe, peitai na lele le lupe faatoa foi ane i le afiafi ma le lau olive mata o lo o ū mai i le gutu. O le faailoga lena ua ta'u mai ai ia Noa, ua uma le lolo ma ua leai se vai i le elelee.

Ua oo i le tausaga e ono selau ma le tasi, o le uluai masina o le uluai aso o le masina, ua matuā leai se vai ma ua matūtū le fogaeleele, ona to ese ai lea e Noa o le ufi o le vaa. Ua ia iloa ai ua uma le lolo.

O le tatou tala lena tamaiti. O se aoaoga lelei mo tatou. E faia e le Atua vavega tetele mo le tagata usitai. Ae le fiafia le Atua i le tagata agasala. Ua uma le lolo ma iloa ai e Noa le alofa o le Atua ia te ia ma lona aiga aua ua faasaoina. A ua leai uma tagata sa aamu ia te ia ma lona aiga.

Uiga o Upu:

Fa'aagi: ua agi mai le matagi

Ararata: igoa o le mauga

Maiiui: mou atu le vai (sami)

Fefoifoiai: alu ma toe sau

Mānu o tumutumu o mauga : ua aliali mai tumutumu o mauga


GALUEGA FAATINO: Taliga Fesili

1. O ai le igoa o le mauga na to'a ai le vaa? (*Ararata*)
2. O le a le manu sa faa lele muamua e Noa? (*Lupe*)
3. Na lele muamua le manu toe foi mai ona faatali lea o Noa ona toe faalele ai foi lea? O le a le umi na faatali ai Noa. (*7 aso*)
4. Faafefea na iloa e Noa ua mai le vai? (*lau olive na sau ma le lupe*)
5. Aisea na oo ai le lolo? (*ina fasiotia ai tagata agasala*)

PESE : O ai na fau le vaa..O ai na fau le vaa..

A'OA'OGA:

1. E faia e le Atua vavega i lo tatou ola
2. Usitai pei o Noa
3. E le fiafia le Atua i le agasala.



UA UMA LE LOLO

ASO SA: 3 Fepuari 2019

MATAUPU : O LE LALOLAGI FOU

SINI: Ia aoaoina le vasega ia malamalama na faia e le Atua le lolo ina ia aveesea ai le lalolagi tuai, a ia amatalia se lalolagi fou mo tagata

TUSI FAITAU : Kenese 8 : 15 – 22

FESOASOANI MO FAIAOGA:

Talofa tamaiti? O a mai outou i leni taeao? Ia lelei o lea o le a toe sosoo atu le tatou tala mai le vaiaso talu ai. Ua uma le lolo, ona fetalai lea o le Atua ia Noa ma lona aiga ina ia ulufafo mai le vaa. Ona omai ai lea i fafo o Noa ma ona atalii (*manaia foi pe a fesiligia le fanau i igoa o le fanau a Noa*) o manu vaefa uma ma manu felelei ma meaola fetolofi uma sa i totonu o le vaa. O le faamoemoe ina ia amata ai se lalolagi fou.

Ona faia lea e Noa o le fata faitaulaga ma osi ai le taulaga faafetai i le Atua, na ia faaaogaina foi nisi o manu vaefa pepeti e mamā, ma manu felelei e mamā e osi ai le taulaga. Ona lagona lea e le Atua le manogi lelei o le taulaga ua faia e Noa. Ona alofa lea o le Atua ia Noa, ma ia tautō ai e na te le toe taia le laueleele. Ona galulue ai lea o Noa ma lana fanau e atiae ma amata faatoaga ma mea uma o le lalolagi fou.

Ua mavae le lalolagi tuai ina ua tafia e le lolo, ao lea ua iai Noa ma lana fanau ma meaola uma sa i le vaa, e amatalia le lalolagi fou. O le amataga lea o le lalolagi fou lea lava e oo mai ai i le taimi nei. Ia o le tala lena tamaiti. Ao se aoaoga mo tatou e faia e le Atua se lalolagi fou i lo tatou ola. Afai o tatou sa vaivai, ma faaletonu i le aoga, e mafaia e le Atua ona avea i tatou ma tamaiti atamamai ma malolosi e faia lona finagalo. Ia avea foi i tatou ma tagata e faia se lalolagi fou i totonu o tatou aiga, e ala i le faia o mea lelei e finagalo ai le Atua.

Uiga o Upu:

Selesele : taimi e matua ai fua o faatoaga

Vaitoelau ma le vaipalolo : vaitaimi faatulagaina o le tausaga

GALUEGA FAATINO: Taliga Fesili

1. O ai na faasaoina mai le lolo ma amataina le lalolagi fou?
2. O ai igoa o atalii o Noa? *E leo ta'ua i le tala ae manatu o se fesili ua iloa lautele...*
3. Aisea na faasaoina mai ai e le Atua manu tai lua mai ituaiga uma o manu?
4. O a mea na fai ai e Noa le taulaga faafetai?


TALI:

1. Noa ma lana fanau
2. Semu, Hamo ma Iafeta
3. Ina ia amata ai se lalolagi fou e ala i le toe fanafanau o manu
4. Manu pepeti e mamā, ma manu felelei pepeti e mamā.


PESE: O ai na fau le vaa....

A'OA'OGA:

1. E mafaia e le Atua ona faafou o tatou olaga
2. E faamanuia le Atua i le tagata usitai



TAULAGA FAAFETAI MO LE LALOLAGI FOU



FEAGAIGA O LE NUANUA

ASO SA: 10 Fepuari 2019

MATAUPU: MULIMULI IA IESU

SINI: Ia aoaoina le vasega ia malamalama na valaauina e Iesu nisi o ona so'o e tuu a latou galuega ae mulimuli atu ia te ia.

TUSI FAITAU : Mareko 1:16 – 20

FESOASOANI MO FAIAOGA:

Ina ua uma ona papatisoina Iesu i le vai i Ioritana, ona amata ai lea ona fai o lana galuega talai. Ua ia aoao atu i tagata e uiga i le malo o le Atua. O le galuega a Iesu e lei faigofie, e tatau ona iai nisi e fesoasoani ia te ia. O le ala lea na ia manatu ai o le a ia tofia nisi e fai ma ona soo e mulimuli atu ia te ia i le galuega.

Ua savali atu Iesu e latalata ane i le vai o Kalilaia, ona iloa ai lea e ia o Simona ma Aneterea lona uso ua la lafo le la upega i le vai, ona o tama nei o tagata fagogota. Ona fetalai atu ai lea o Iesu ia tei laua "Ina mulimuli maia ia te au ou te faia oulua ma faifaiva i tagata". Ona tuua lea ei laua o le la upega a ua mulimuli atu ia Iesu ma lana talaiga.

E lei lava ona savavali atu Iesu ma Simona ma Aneterea, ae latou iloa foi lea o Iakopo le atalii o Sepetaio ma Ioane lona uso, o lo'o i luga o le vaa o lo'o tau su'i masae o le la upega. Ua toe valaau ai foi Iesu, ona tuu foi lea o le la upega a ua mulimuli ia Iesu. Oi latou nei sa avea loa ma soo o Iesu e fesoasoani i lana galuega. Ua tuua latou feau masani i aiga, a ua latou mulimuli ia Iesu.

Ua tatou iloa tamaiti o Iesu o le Alo pele o le Atua, na ia sau e talai le tala moni i le malo o le Atua. Le ala foi lea ua tatau ai ona mulimuli ona soo ia te ia. E faapena foi tatou e tatau foi ona tatou mulimuli ia Iesu. E le o vaai tatou ia Iesu, ao le uiga o lo tatou mulimuli ia Iesu - Ia tatou faia le faaaoao ma usitai i aoaoga a Iesu ua uma ona aumai mo tatou. O a nei aoaoga? Ioe o le usitai, faalogo, loto maulalo, alofa, agamalu ma isi. O mea na e iloa ai lo tatou mulimuli ia Iesu ma avea ma ona soo e faailoa lona finagalo i isi tagata.

GALUEGA FAATINO: Saili mai upu nei i totonu o le paso?

Kalilaia, Simona, Aneterea, Sepetaio, Iakopo, Ioane.

T	U	O	P	D	A	S	G	F	K
I	U	L	L	S	I	M	O	N	A
E	P	G	F	S	A	H	J	L	L
O	P	T	R	E	A	F	K	K	I
S	E	P	E	T	A	I	O	T	L
E	T	U	O	I	O	P	K	L	A
A	S	F	D	K	L	P	U	Y	I
A	S	R	T	E	U	T	I	O	A
N	M	I	A	K	O	P	O	S	F
U	K	O	R	P	H	J	L	E	R
S	F	A	L	K	I	J	O	P	N
E	S	N	M	N	P	F	E	T	L
A	N	E	T	E	R	E	A	A	S

PESE: UA OU FILIFILI E MULIMULI IA IESU


Ua ou filifili e mulimuli ia Iesu
 Ua ou filifili e mulimuli ia Iesu
 Ou te le toe foi, ou te le toe foi
 Le satauro i o'u luma, le lalolagi i o'u tua
 Le satauro i o'u luma, le lalolagi i o'u tua
 Ou te le toe foi, ou te le toe foi
 Ua na'o au lava, e mulimuli ia IESU
 Ua na'o a'u lava, e mulimuli ia IESU
 Ou te le toe fo'i, ou te le toe fo'i

A'OA'OGA:

1. Faalogo ma usitai i aoaoga a Iesu
2. Tatou mulimuli i aoaoga a Iesu.
3. Ia fai i tatou ma soo e talai le tala lelei.



UA TUUA LO LATOU UPEGA AE MULIMULI IA IESU



IAKOPO MA IOANE O LO O SU'I MASAE O LE UPEGA

ASO SA: 17 Fepuari 2019

MATAUPU: UA SUIA LE IGOA O IAKOPO

SINI: Ia aoaoina le vasega ia malamalama ua suia le igoa o Iakopo ona o lona finau malosi ia toe lelei lo la va ma lona uso o Esau.

TUSI FAITAU: Kenese 32: 20 - 32

FESOASOANI MO FAIAOGA:

Talofa Tamaiti??malo le onosai mai i le tatou aoga o lenei taeao. O le tatou tala i lenei taeao o le tala ia Iakopo. Manatua lea sa sola Iakopo mai lona uso o Esau. Ao lea la o le a tatou talanoa. O lea ua toe foi mai Iakopo e feiloai ma lona uso matua o Esau. O Esau sa nofo i le nuu o Seira i Etoma. Ina ua latalata ona oo ai Iakopo ma lona aiga ma ana auauna ma ana lafu manu e tele, sa lagona e Iakopo le fefe ina nei toe tau mai e lona uso o Esau lana mea leaga lea sa fai ia Esau. *(Manuia foi ae toe fesili poo le a le mea na mafua ai ona sola Iakopo,,ona toe faaauau ai lea o le tala).*

O le fefe la o Iakopo, lea na ia faamuamua ai nisi o ana auauna ma ana lafu manu. Sa faatonu e Iakopo e na muamua ia faapea atu ia Esau – “o lo o mulimuli atu lau auauna o Iakopo”. Sa ave foi e Iakopo nisi mealofoa mai ana lafu manu ma ana oloa e ave ia Esau. Ona muamua lea o ana auauna, ao ia ua nofo pea i le togalauapi.

Ua oo i le po ona ia tulai lea ma ave ana avā e toalua, ma ana auauna fafine e toalua, ma ona atalii e toasefulu ma le toatasi ma laasia atu le asaga o Iapoka. Ua ia avatu lona aiga ma ana auauna ma tuu i le isi itu o le vaitafe. Ae ua totoe ai nao ia – ua oo i le po, ona la fagatua ai lea ma le agelu. Ua oo ina ao, ua iloa e le agelu ua malo o ia ia te ia. Ona ia pai atu ai lea i le fa’iga o lona suilapalapa ona see ai lea o le ivi. Ua faiatu o ia ia Iakopo – “Ina tuu maia o au ou te alu” na tali Iakopo e le mafai ona ia tuua o ia seiloga e faamanuia mai ia te ia.

Ona faimai ai lea o le agelu – “ O ai lou igoa “ona tali atu ai lea o ia. “O a’u o Iakopo”Ona faapea mai lea o ia ia te ia – “ E le toe ta’ua oe o Iakopo, a’o Isaraelu o lona uiga O le alii o ia i le Atua, aua ua e pei o se alii ua e finau atu i le Atua atoa ma tagata ma ua e manumalo”Ona alu ai lea o Iakopo ma setusetu lona suilapalapa, ua uma ona faamanuia iai le Atua, ua le toe igoa foi ia Iakopo.

Ia o le tatou tala lena tamaiti – O le suia o le igoa o Iakopo, o le faailoga o le faamanuia a le Atua ia Iakopo, o le faamanuia o le a leai se toe feseeseaiga i lo la va ma lona uso o Esau. O le a maua

le filemu e feiloai ai ma Esau. O se aoaoga mo tatou le fanau – Ia tatou finau i le Atua, ia tatou fagatua ma le Atua e faamanuia mai ai foi le Atua iai tatou.

Uiga o Upu:

Faalaulelei: toe faalelei le va, teuteu se leaga
 Toagalauapi: nofoaga o lo o api ai, nofoaga o loo faamautu ai
 Fagatua : pii, fusifusi, mafuta.
 Setusetu: savali faasapasapa, le paleni le savali
 Ua na memei: maso o lo o i le suilapalapa.

GALUEGA FAATINO: Faatumu avanoa i upu o lo o i lalo

Finau, Toasefulu, suilapalapa, Iapoka, fagatua, Israelu, Iakopo, aoina.

Ua ia tulai foi i lea po, ma ave ana ava e toalua ma ana auauna fafine e toalua, ma ona atalii e 1_____. ma le toatasi, ma laasia atu le asaga o 2_____. Ua tuua foi Iakopo e toatasi, ua la 3_____ foi ma le tasi tagata ua oo ina 4_____. Ua iloa foi e ia ua le malo ia te ia, ona pai atu lea o ia i le faiga o lona 5_____. Ona faapea mai lea o ia, e le toe ta'ua lou igoa o 6_____, a'o 7_____, aua e pei o se alii ua e 8_____ i le Atua atoa ma tagata ua e manumalo.

TALI: 1. Toasefulu, 2. Iapoka, 3. Fagatua, 4. Aoina, 5. Suilapalapa, 6. Iakopo, 7. Israelu, 8. Finau.

PESE: LORD YOU KNOW ME

Lord you know me
 You know everything I do
 You see me when I'm praying
 And when I'm working too
 You are all around me
 And you take care of me
 Even in the night time
 You're still be close to me
 You know what I'm thinking and how I feel today
 Help me love you always
 You're A.....O...K

A'OA'OGA:

1. Ia tatou finau atu i le Atua.
2. O le Atua e aumaia le filemu.
3. Ia maua le loto faamagalo.



IAKOPO O LO'O FAGATUA MA LE AGELU

ASO SA: 24 Fepuari 2019

MATAUPU: O KITIONA LE TOA

SINI: Ia aoaoina le vasega ia malamalama e valaauina e le Atua le tagata faatauva'a e fai ma ana auauna.

TUSI FAITAU: Faamasino 6:11 – 18

FESOASOANI MO FAIAOGA:

Talofa tamaiti? O ai e na te faamatalaina mai le uiga o le upu Toa? (*O se fesili e amata ai le mataupu e tatai mai ai manatu o tamaiti, ae pule lava lau susuga le faiaoga*). O le Toa o se tagata e malosi le tino, e le palaa le loto, toe lelei le mafaufau. E leo se toa le tagata malovale ma soona fai mea leaga e aafia ai nisi tagata. O le toa faimai e na te pulea lelei lona loto.

O Kitiona o le atalii o Ioasa le sa Apieserū. Ua alu atu le agelu ua nofo i lalo o le tapeneto sa i Ofira. O Kitiona sa ia sasa saito i le mea e soli ai vine ina ia lilo ai Mitiana. Ua faaali atu le agelu ma faapea atu ia Kitiona – *“Oe na le toa malosi, o ia te oe le Alii”*. Ua tali atu Kitiona i le agelu – *“E le Alii e, se a le mea ua oo mai ai nei mea uma ia tei matou; o ifea ona vavega na ta'u mai e o matou tamā ia tei matou”* E lei mafaufau Kitiona o le a filifilia o ia e le Atua e fai ma toa e alu e tau le taua ma Mitiana.

Peitai o le valaauina o Kitiona o le feau lea mai le Atua. Ua tuu iai e le Atua le malosi o le potu ma le mafaufau lelei ina ia laveaiina Isaraelu mai lima o Mitiana. Sa lagona le faatauva'a o le tama o Kitiona, ona e manatu o ia ua nao se tagata e faatauva'a. E faatauva'a foi lona aiga i Manase. Faimai upu o le tali a Kitiona – *“faauta mai ua topito ona faatauva'a lo'u aiga i Manase; o a'u foi, o le aupito itiiti i le iga o lo'u tama”* Ona tali lea o le agelu – *“Aua ta te faatasi lava ma oe, e te fasia foi Mitiana, e peiseai o se tagata e toatasi”* Ua lagona le toa o le loto o Kitiona ona ua ia mautinoa, o le a au faatasi o ia ma le Atua. Ua malosi foi lona mafaufau aua o le a fesoasoani le Atua i le faataunuina o le taua. Na faia e Kitiona se taulaga e faafetaia ai le Atua ona o lona filifiliaina o lona faatauva'a e fai ma ana mea faigaluega.

O le tala lena tamaiti – o se aoaoga lelei mo tatou. O tatou uma e filifilia e le Atua e fai ma toa i totonu tatou aiga, nuu ma le Ekalesia. E leo le toa i mea leaga ma amio mataga, ao le toa e fai mea lelei e tauleleia ai o tatou aiga. E le ta'ua oe o se toa pe a e faalogogata i ou matua. E leo oe o se toa pe a e le toaga e fai au meaaoga. Ia manatua e tatou le fanau- o lo o 'au faatasi le Atua ma i tatou. E leai se mea tatou te popole ai, aua o lo o fesoasoani mai le Agaga o le Atua. Ia manuia tele outou le fanau.

Uiga o Upu

Tapeneto: laau tele (tupu tele)

Soli ai vine: toga vine

Topito: pito sili, aupito sili

GALUEGA FAATINO: Ta'u mai nisi tagata o lo o ta'ua o le Toa i le Tusi Paia?

- Koliata
- Tavita
- Samasoni
- Paulo...ma isi...

PESE: HE'S ABLE, HE'S ABLE

He's able, he's able

I know He's able

I know my Lord is able to carry us through

(repeat)

He heals the broken-hearted

And set the captives free

He makes the lame to walk again

And the blind man to see! OH YES!

O le Atua na te mafaia

Ua ou iloa o ia e mafaia

Ua ou iloa e mafaia e le Alii ona fesoasoani mai

A'OA'OGA:

1. E filifilia e le Atua lo tatou faatauva.
2. Ave i tatou ma toa o le tala lelei.
3. Aua tatou te manatu faatauva.



KITIONA MA LE AGELU

MANATU TAIALA O MATI : IA OLA FESOASOANI

O le ola fesoasoani tasi lea o mea taua i le olaga o tatou le fanau. E le gata i totonu o aiga, totonu o aoga ma so'o se mea lava. E iai foi taimi e lagona ai e tatou le vaivai, ao le vaega lena e taua ai le ola fesoasoani. O le ola fesoasoani o le faia lava lea o le finagalo o Iesu e pei ona ia poloai mai ai mo tatou. E faigofie ai le faigata ma le tele o galuega e tatou te faia. Ia manuia mataupu o lenei masina.

ASO SA: 3 Mati 2019

MATAUPU : O LE SAMARIA AGALELEI

SINI: Ia aoaoina le fanau ia malamalama – o le uiga o le Samaria agalelei, o le faia lea o se galuega fesoasoani mo le isi uso a tagata.

TUSI FAITAU: Luka 10: 29 – 37

FESOASOANI MO FAIAOGA:

O le tatou tala o le a tatou talanoa ai i lenei taeao tamaiti, o le tala na faamatala e Iesu e faamalamalama ai i le tasi aoao tulafono sa faafiatonu o ia ia Iesu ma fesili po o ai e la te tuaoi? *(E fautuaina le faamatala pea nao le tala o le samaria , ae ona o le tusi faitau o lo o iai sosooga o le tala ma le fesili ia Iesu, mulimuli ane toe fesili ai Iesu, ae manaia ae faatali pea i ni fesili a le fanau,,ao le faamamafa o le Samaria na agalelei)*

Faimai le tala – O le tasi tagata na alu ifo lana malaga mai Ierusalem e alu ifo i Ieriko. Ua maua o ia e tagata faomea i le ala, ua latou aveese ona ofu ma fasi ia te ia ona latou sosola lea ae tiai ai i le auala. Ua alu atu le ositaulaga i le ala ua ia iloa atu le tagata o lo o taoto mai i le ala, ona ui ane ai lea o ia i le isi ala. E lei leva foi ae alu atu le Sa Levi, ua oo ai o ia ma ia iloa foi le tagata o loo taoto i le ala. Ua ia matamata ai ona ia ui ane foi lea o ia i le isi ala. Ona alu atu ai lea o tagata mai Samaria. O tagata mai Samaria tamaiti o tagata ia ua ta'ua o tagata o nuu ese. O le uiga o tagata o nuu ese, o ni tagata e leo ni kerisiano. Ua alu le tagata Samaria ona tau atu ai lea i le tagata o lo o taoto mai i le ala, ua toeitiiti lava oti.

Ua mutimutivale le alofa o lenei Samaria o lea na ia oso ai i lalo mai lana manu, ma ia fai loa le galuega fesoasoani mo lenei tagata puapuagatia. Ua alu atu ma fusifusi ona manu'a, ua liligi foi i ai le suauu ma le uaina, ona faatietie lea ia te ia i lana lava manu ma taitai ia te ia i le fale talimalo, ma tausi ai ia te ia. Ua oo i le taeao o le isi aso ua ia ava'e o tenari e lua ma avatu i le

pule o le faletalimalo sa nofo ai lenei tagata. Ona ia faiatu ai lea i le pule o le faletalimalo – *“Inā e tausī ia te ia, ai se mea e te toe faatau ai, ou te tausī atu ia te oe pe a ou toe sau”...*

O le aoaoga ua faia e le Samaria, o le agalelei atu lea i le tagata ua fasia e le au faomea. E faapena le tagata kerisiano – e fesoasoani atu i isi tagata ua mafatia. O le aoaoga lelei foi mo tatou, toatele tatou a vaai atu ua puapuagatia isi tagata ae atili ai ona aamu. E eseese foi ituaiga faafitauli e tutupu iai tatou le fanau. E mafai ona e vaai atu i le isi tamaitiiti o fia ‘ai, ona e alu lea e faasoa le lua meaai. Pe e te vaai atu foi i se tamaitiiti ua manaomia se peni ao lena e lua au peni, ia faapena ona e fesoasoani ai. O le uiga lena o le tatou mataupu o lenei taeao. Ia tatou ola fesoasoani i o tatou matua, o tatou aiga, ma isi tagata ua puapuagatia.

GALUEGA FAATINO: Taliga Fesili

1. O ai le tagata muamua lea na tau atu i le tagata na fasia ?
2. Ao ai le tagata lona lua?
3. O fea le nuu na malaga iai le tagata na fasia e le au faomea?
4. O le a se uiga o le Samaria agalelei?

TALI:

1. O le ositaulaga
2. O le Sa Levi
3. O Ieriko
4. Ia ola fesoasoani i e ua aafia i faafitauli ma puapuaga.

PESE: GOOD SAMARITAN SONG

Jesus hands were kind hands
 Doing good to all
 Healing pain and sickness
 Blessing children small
 Washing tired feet and saving those fall
 Jesus hands were kind hands
 Doing good to all

A’OA’OGA:

1. Ia ola fesoasoani mo isi tagata.
2. Aua le vaai maualalo i isi tagata.
3. Avea i tatou ma Samaria i totonu o tatou aiga.



O LE SAMARIA AGALELEI

ASO SA: 10 Mati 2019

MATAUPU: UA FESOASOANI IONATANA IA TAVITA

SINI: Ia aoaoina le vasega ia malamalama i le taua o le ola fesoasoani, e pei foi ona fesoasoani ai Ionatana ia Tavita.

TUSI FAITAU: 1 Samuelu 19:1 – 8

FESOASOANI MO FAIAOGA:

O Ionatana ma Tavita tamaiti, e ese le mafanafana o le la faigauo. O Ionatana o le atalii o Saulo le tupu o Isaraelu. Sa iai lagona ese o le tupu o Saulo ia Tavita ona o le malosi ma le atamai sa ia Tavita a’o va tau ai Isaraelu ma nuu tuaoi, ma tele ina manumalo ai. E mafua ona o le taimi lea ua amata ona au faatasi le Atua ma le tama lenei o Tavita. Na tupu tele le loto leaga o le tupu o Saulo ia Tavita, ma ia saili ai loa se auala e fasioti ai Tavita.

O le tusi sa o tatou faitauina, tasi lea o nisi o vaega o le taumafai o Saulo e fasioti Tavita. E tele lava nisi auala na faia e Tavita peitai e lei mafai ai lava ona oti Tavita. Ao le vaega lea sa faitauina o lo o manino mai ai lava le tele o le fesoasoani a Ionatana e laveai mai Tavita mai tonu leaga a lona tama o Saulo.

Ua fai ane Saulo ia Ionatana ma ana auauauma, ia latou fasioti ia Tavita. Ona alu atu lea o Ionatana ma ta’u atu i lana uo o Tavita, o loo lama ia e lona tama e fasioti. Ua fai atu Ionatana ia Tavita ina ia alu o ia ma lafi i se mea lilo. A ua alu Ionatana ma nofo i autafa o lona tama o Saulo ma fai atu ai – “ *Aua nei agaleaga le tupu i lana auaua o Tavita, aua e lei agaleaga o ia ia te oe, a ua agalelei o ia ia te oe, na ia tuu foi lona ola i lona lima , ma na fasi le Filisitia , na fai ai foi e le Alii le faaolataga tele mo lona nuu o Isaraelu. ...* ” Ua faalogo ai Saulo i upu a lona atalii o Ionatana ona ia tauto ai lea i lona atalii e le fasia lava Tavita. Ona alu ai lea o Ionatana ua ta’u atu ia Tavita ona toe sau ai lea o Tavita i luma o Saulo e pei ona masani ai. E lei mafai ona fasiotia Tavita i lea taimi ona o le alofa ma le galuega fesoasoani a Ionatana na faia i lona tama o Saulo.

Ioe tamaiti! Ese le alofa o Ionatana i lana uo o Tavita, e ui ona sa manao lona tama e fasioti Tavita, ae lei mafai ona faataunuuna lea faatonuga. A ua ia faia le galuega fesoasoani i lona tama. O le galuega fesoasoani lava lea mo Tavita, ma ua toe faasaoina ai lona ola mai le faatonuga a le tupu. O ai nisi o tatou e pei o Ionatana le loto fesoasoani i lana uo o Tavita????

O le aoaoga lena mo tatou, ia tatou faia ni galuega fesoasoani i totonu o tatou aiga, ma nisi tagata o lo o manaomia lau fesoasoani. Ia e fesoasoani i ou matua, o lou uso ma lou tuafafine/tuagane.

GALUEGA FAATINO: Tali i le sa'o poo le sese

1. Na poloai Saulo i ana auauna ma lona atalii o Ionatana ina ia aua nei o latou fasioti i lana auauna o Tavita. (sese)
2. O Tavita o le uo mamae a Saulo, ao Saulo o lona tama Ionatana. (sese)
3. Na faailoa e Ionatana ia Tavita le tonu a Saulo o lo o lama ia Tavita ina ia fasiotia.(sa'o)
4. O Ionatana na ia faia le faaolataga tele mo Isaraelu.(sese)
5. Na talia e Saulo le upu a lona atalii o Ionata ina ia aua nei oo le oti ia Tavita lana uo mamae.(sa'o)
6. E lei toe foi ane Tavita ia Saulo ina ua uma ona ta'u atu ai e Ionatana le tonu a lona tama o Saulo.

PESE: ALOFA MA LOTO FESOASOANI

Love is something that you give it away x3
 Love is something that you give it away
 Because it comes right back to you
 It's just like a magic penny
 Hold on tight and you won't get any
 Lend it, spend it, or give it away
 Because it comes right back to you.

Alofa o se mea e te faasoa atu, faasoa atux2
 Alofa o se mea e te faasoa atu
 Ae toe foi ma ii se aso
 Faatusaina i se tupe itiiti
 Taofi mau e leai se faasili
 Tufa atu, ma faasoa atu
 Ae toe foi mai i se aso

Caring is something.....,smile.....Joy.....Happiness

A'OA'OGA:

1. Ia loto fesoasoani.
2. Alofa i lau uo ae aua le taulamalama.
3. Tetee le fili e taufaaosooso



IONATANA MA LANA UO O TAVITA

ASO SA: 17 Mati 2019

MATAUPU: O LE FAFINE PUNATOTO

SINI: Ia aoaoina le vasega ia malamalama o a puapuaga, o ma'i ma mafatiaga, e maua ia Iesu le vai fofo ma le faamalologa sili pe a moni lo tatou faatuatua.

TUSI FAITAU: Mareko 5:25 – 34

FESOASOANI MO FAIAOGA:

Talofa Tamaiti?. O le tatou tala o le a faamatala ole tala i le fafine puna toto sa faamalolo e Iesu. O le fafine lenei ua leva ona aafia i le mai o le puna toto. E sefulu ma le lua tausaga talu ona fealuai lenei tinā ma le ma'i. Na saili fofo solo, ma ua tele ana tupe ma ana oloa sa faaalaina ai i le sailia o se fofo o lona gasegase. Ae lei mafai ai lava ona manuia ai.

Ua faalogo lenei tina mafatia ia Iesu, ona alu ane ai lea o ia ia te ia. Ao i ai Iesu ma le motu o tagata, na alu atu lenei tina ma lona manatu, se'i ona pa'i lava i le ofu o Iesu e mautinoa lava e na te malolo ai. Ua taumafai atu le tina ma iu ai lava ina pa'i atu i le ofu o Iesu. Fai mai le molimau na ona pa'i atu lava o le tina lenei i le ofu o Iesu, ona utu loa lea o lona puna toto, ma ia iloa e ia lona tino ua faamaloloina lona tino ma'i sa iai. Ua iloa e Iesu ua alu ese atu le mana sa ia te ia, ona ia faliu ai lea i tua ma fesili atu i le motu o tagata po o ai lea na pa'i ane ia te ia.

Ona tali atu ai lea o ona soo ia te ia – “Ua e silafia le motu o tagata e toatele o lo o fetaomi mai i latou ia te oe, ae te fetalai mai ea. Po o ai na pa'i atu ia te oe”? Ua tilotilo solo pea Iesu e vaai poo ai lava lea na pa'i atu ia te ia. O le taimi lea tamaiti, ua lagona le fefe o le tina puna toto, o lea na ia savali atu ai ma tootuli i luma o Iesu ma ia faamatala, o ia na pa'i atu i lona ofu ona o lona ma'i e fia malolo. Ona fetalai atu ai lea o Iesu ia te ia – *“Lo'u afafine o lou faatuatua ua e malolo ai, ina alu ia oe ma le manuiama ia e malolo i lou ma'i tiga”*

Ioe tamaiti!,,ua manuia le ma'i punatoto o lenei tina, ona o lona faatuatua talitonu faamaoni e manuia lona ma'i pe afai e tau lava o le ofu o Iesu e pa'i atu iai. O le tina ua leva ona pologa i le ma'i, ao lea faatoa malolo ona o le mana laveai o lo tatou Alii o Iesu Keriso. O a puapuaga ma faigata ma ma'i ia tatou saili ia Iesu ma le faatuatua moni. O se aoaoga foi lena mo tatou le fanau. Ia moni lo tatou ola faatuatua ia Iesu Keriso, aua o lona toetu manumalo ua tatou manumalo faatasi ai ma ia i le ola e faavavau. Manuia tele outou le fanau.

Uiga o Upu:

Fetaomi: tumu,

Gatete: fefe

GALUEGA FAATINO: Manaia foi ae fai se faatinoga puupuu o le tala...

PESE: Fafine Punatoto


1. Le fafine ua leva ona mai
Leai se fomai e malolo ai
E tasi lava le ala e mafai ai
Talitonu i lona suafa

Tali: Pai atu le fomai sili
Pai atu e malolo ai
E tasi lava le alae mafai ai
Talitonu i lona suafa.

2. Talofa ua leva ona fiaola
Ua siliga e le maua o se saolotoga
Le taimi na pai atu ai i ofu o le matai
Na ia lagona ua ia faamalolo mai

A'OA'OGA:

1. Ia moni lo tatou ola faatuatua.
2. Talitonu i le mana faamalolo o Iesu Keriso.
3. Tatou saili fofo ia Iesu Keriso.



FAFINE PUNATOTO UA PA'I ATU I LE OFU O IESU

ASO SA : 24 Mati 2019

MATAUPU: UA TOFIA IOSUA

SINI: Ia aoao le vasega ia malamalama ua valaauina e le Atua Iosua ona o ia o se tagata sa mulimuli ma vaavaai ia Mose ao avea Mose ma taitai o Isaraelu.

TUSI FAITAU : Iosua 1 : 1 – 9

FESOASOANI MO FAIAOGA:

Ina ua uma le oti o Mose, ona valaau ai lea o le Atua ia Iosua le atalii o Nuno. O Iosua o ia lea sa taumulimuli solo ia Mose ma ua ia iloa ai le tele o mea lelei na aoaoina iai e Mose. Ona tofia lea e le Atua o Iosua e na te taitaiina lona nuu o Isaraelu, e sopoia atu le vai o Ioritana ma o atu ai loa i le nuu o Kanana.

Sa folafola foi e le Atua le tele o laueleele o le a oo iai le pule a Iosua ma Isaraelu. E pei o Lepanona, vaitafe tele o Eufirata, ole nuu uma o sa Heti, e oo atu i le sami tele o le mea e goto ai le la e fai mo Isaraelu. Sa matua faamanuia foi le Atua i le tulai mai o Iosua e taitai le nuu o le Atua. Na fetalai le Atua e leai lava se tagata e tu ma tetee i le taitaiga a Iosua. Ma o le a auai le Atua ia te ia i aso uma o lana taitaiga.

O le tofia ina o Iosua Tamaiti, o le valaauina mai le Atua ona o lona ola usitai ma faalogo i faatonuga a Mose. O se tagata foi sa usitai ma faalogo i le Atua ao tamaitiiti. Lea ua ua matua ua na iloa le lelei o le ola usitai aua lea ua tofia o ia e taitaia le nuu toatele o Isaraelu.

O le avea o tatou ma taitai, e amata atu i le taimi nei. E amata atu i lou ola usitai i ou matua ma e matutua. E amata atu i lou toaga nei e fai au meaaoga ma aua le taumulimuli i taitaiga sese e le manuia ai lo tatou ola.

Uiga o Upu:

Sopoia: savavali i le isi itu

Alofivae: pito i lalo o le vae

Anaana: usitai

GALUEGA FAATINO: Saili mai upu nei i totonu o le paso?

Ioritana, Lepanona, Iosua, Mose, tauagavale, Eufirate.

N	M	L	E	P	A	N	O	N	A
I	O	S	U	A	U	O	I	I	E
S	A	U	F	E	T	U	N	L	M
I	O	R	I	T	A	N	A	P	O
S	A	V	R	T	E	U	O		S
T	A	U	A	G	A	V	A	L	E
M	S	A	T	E	U	I	O	P	M
F	L	U	E	E	S	A	N	O	U


PESE: **E LEAI SE MEA E FAIGATA I LE ATUA**

E leai se mea e le mafai
 Pe a faatuatua i le Atua
 E leai se mea e le mafai
 Pe a faatuatua i lana Upu
 Faalogo ia ao fetalai
 E iai se mea e faigata
 Ia faatuatua i le Atua
 Ma lana Upu Paia
 Aua o mea, soo se mea
 Ioe, e mafaia mea uma e le Atua.


Nothing is impossible when you put your trust in God
 Nothing is impossible when you're trusting in His word
 Hearken to the voice of God to thee
 Is there anything too hard for me??
 Then put your trust in God alone and rest upon His Word
 For everything, Oh everything
 Yes, everything is possible with God.

A'OA'OGA :

1. Ia faalogo ma usitai
2. E avea i tatou ma taitai i le lumanai pe a faia le finagalo o le Atua
3. Faalagolago i le Atua.



UA OTI MOSE



UA TOFIA IOSUA

ASO SA: 31 Mati 2019

MATAUPU: O LE TAGATA LEPELA

SINI: Ia aoaoina le vasega ia malamalama o le faamaloloina o le tagata lepela ua faailoa mai ai le mana faamalolo o le Alii o Iesu Keriso.

TUSI FAITAU : Mataio 8:1 – 4

FESOASOANI MO FAIAOGA:

Talofa Tamaiti? O a mai outou i lenei taeao fou. Ia o le taeao lenei o le a tatou talanoa ai i le tagata sa ma'i lepela na faamalolo e Iesu. O ai sesi e na te iloaina lenei ma'i o le lepela???(*Taua le malamalama o le fanau i lea ituaiga ma'i, ona e seasea ona tatou faalogo ai i lenei ma'i i si o tatou atunuu, atonu a e tele nisi ma'i e tau latalata iai i le lepela*) Ia o le ma'i lepela tamaiti o le mai lea e mafai ona faapea o le tino ua so'o pe tumu i po'u sei tulou. (ma'i papala) (*E manatu ua iloa e le fanau le po'u, e mafai ona faapea o le tino lilofia i le tele o po'u.,o lo o taumafai atu se ata o se tagata lepela mo le silafia atili e le fanau.*)

O le tala faimai ua alu a'e Iesu i le mauga, ona mulimuli atu ai lea o le motu o tagata e toatele. Ona alu atu ai lea o le tagata lepela ua ifo atu ia te ia. Faimai le fesili a le tagata lepela – "*Le Alii e, afai e te finagalo iai e mafaia lava ona faamama mai ia te au.*" Ona aapa atu ai lea o le lima o Iesu ua pa'i atu ia te ia ma faapea atu – "*Ou te loto iai ina mama ia oe*" Ona mama ai lea ma ua te'a le mai lepela o lea tagata. Ona fai atu ai lea o Iesu ia te ia ina ia faaali o ia i le ositaulaga ma avatu le taulaga na poloai ai Mose.

O le mana o Iesu faatasi ai ma le loto faatuatua o le tagata lepela na faigofie ai ona ia malolo ma te'a ese le ma'i lepela mai lona tino. Ua iloa mautinoa e le tagata lepela, e mafaia e Iesu ona ia faamalolo ia te ia. Ioe tamaiti??ia tatou talitonu e leai se mea e faigata ia Iesu pe afai e moni ma faamaoni lo tatou faatuatua ia te Ia. Ua aoao mai foi i ai tatou le fanau, ia moni lo tatou ola faatuatua, poo le a lava le faigata o le ola aoaoina aemaise o meaaoga, e faigofie pe a tatou faatuatua ia te ia faatasi ai mlo tatou toaaga e faia a tatou meaaoga..Ia manuia tele outou le fanau.

Uiga o Upu:

Maliu: alu atu

Lepela: o le ma'i papala

GALUEGA FAATINO: Taliga fesili

1. O ai se tagata sa maua i le ma'i lepela o lo o ta'ua i le Feagaiga tuai? (*Iopu*)
2. O le a le upu a le lepela na fai ia Iesu (– “*Le Alii e, afai e te finagalo iai e mafaia lava ona faamama mai ia te au.*”)
3. Ao le a le tali a Iesu ? (“ *Ou te loto iai ina mama ia oe*”)
4. Aisea na faigofie ai ona malolo le tagata Lepela? (*Mana o Iesu ma lona faatuatua faamaoni*)
5. O le a le tala mulimuli a Iesu i le tagata lepela? (*Faaali i le ositaulaga, ma avatu le taulaga*)

PESE: O MAFATIAGA

O Mafatiaga e ave uma ia Iesu
 Aua o ia e alofa ia te au x2
 Luga luga luga luga luga luga luga luga
 Sii Iesu i luga
 Lalo lalo lalo lalo lalo lalo lalo lalo
 Tulei Satani i lalo

A'OA'OGA:

1. O Iesu le fomai sili
2. Ia malosi le ola faatuatua.
3. E o faatasi le faatuatua ma galuega.



UA FAAMALOLO E IESU LE TAGATA LEPELA

ASO SA: 7 Aperila 2019

MATAUPU: O LO O OLA IOSEFA

SINI: Ia aoaoina le vasega ia malamalama na manuia ma ola pea Iosefa ona ua uma ona filifilia e le Atua, e ui na agaleaga ai ona uso.

TUSI FAITAU: Kenese 45: 25 – 28

FESOASOANI MO FAIAOGA:

O lenei tala e manatu ua malamalama ai tatou a tamaiti?. Manatua o Iosefa ma ona uso lea sa latou agaleaga ia te ia ma faatau ese atu i tagata Mitiana. Ona latou o atu lea ma fai le tala pepelo i lo latou tama o Iakopo. Lea na latou fasi le manu ma fufui ai le ofu o Iosefa i le toto o le manu ma fai atu le tala ai ua ai e se manufeai na’o le ofu na latou maua.

Ua tatou iloa na manuia le olaga o Iosefa i Aikupito ma tofia ai e vaaia le nuu i le taimi o le oge. Ona o atu ai lea o uso o Iosefa e faatau mai ni a latou meaai i Aikupito, a’o Iosefa o lo o ia pule ma vaaia Aikupito i taimi o le oge. Na faailoa ai e Iosefa o ia lea, ma manao e o e aumai lo latou tama o Iakopo.

O le vaega la lea sa tatou faitauina i lenei taeao tamaiti. Lea ua foi ane uso o Iosefa mai Aikupito e o i Kanana ma le tala fiafia i lo latou tama o lo o ola pea Iosefa lona atalii. O se tala sa tupu ai le fiafia o le toeaina o Iakopo. Sa manao le toeaina ina alu sei vaai i lona atalii.

Manatua ua manatu lava Iakopo ua oti si ona atalii o Iosefa, a’o lea ua toe avatu e ona uso le tala e leo oti o lo o ola pea Iosefa. Ao le ola pea o Iosefa ua ia te ia faamanuiaga mai le Atua. E mafua ona toe fetau Iosefa ma ona uso ona o le Atua sa ia taitai mai i le ola o le tama lenei o Iosefa. O Iosefa ua uma ona filifilia e le Atua mo le faailoa atu o lona finagalo. O Iosefa ua filifilia e le Atua e fai ma faaola i lona aiga.

Ioe tamaiti, e faapena tatou e filifilia i tatou e le Atua mo ana feau ma ana galuega eseese. O tatou o lo o faamoemoe mai ai o tatou aiga mo se lumanai lelei, ia tatou pei o Iosefa sa fai ma faaola i lona aiga i taimi o le oge tele. O le valaauina o tatou e le Atua e faamoemoe ina ua tatou savavali e tusa o lona finagalo. Ia manuia tele outou le fanau.

GALUEGA FAATINO: Lisi mai le fanau a Iakopo

PESE: LE ALOFA O LE ATUA E OFOFOGIA


Le alofa o le Atua e ofoofogia x3
 Le alofa silisili lea mo au
 E maualuga ou te le a'eina
 E maualalo ou te le mauuina
 E lautele ou te le opoina
 Le alofa silisili lea mo a'u

GOD'S LOVE IS SO WONDERFUL

God's love is so wonderful
 God's love is so wonderful
 God's love is so wonderful
 O wonderful love
 It's so high you can't get over it
 It's so low you can't get under it
 It's so wide you can't get around it
 O O WONDERFUL LOVE

A'OA'OGA:

1. E faaaogaina i tatou e le Atua i le lumanai
2. Ave tatou ma faaola i o tatou aiga.
3. Faamoemoe i le Atua e manuia ai.



IOSEFA I AIKUPITO

ASO SA : 14 Aperila 2019

MATAUPU : MALAGA FAATUPU

SINI : Ia aoaoina le vasega ia malamalama o le malaga faatupu a Iesu o le amataga lea o le aga atu i ona puapuaga.

TUSI FAITAU: Mataio 21:1 - 11

FESOASOANI MO FAIAOGA:

Talofa tamaiti? O a mai outou i leni taeao fou?. O le aso Sa foi leni ua ta'ua o le aso Sa o le laupama. O le tala faimai ina ua latalata Iesu ma ona soo i Ierusalem, ua oo i Petefake i le mauga o Olive. Ona aauina atu lea o Iesu o nisi o soo e toalua e tatala mai le asini o lo o i le aai i luma atu. Na poloai e Iesu ona soo ia e toalua, a fai ifo se tasi i le asini ona la fai lea iai – Ua mana’o iai le Alii.

Ona o ai lea o soo nei e toalua ua tatala mai le asini,. O le asini tamaiti – o lo o faalia ai le uiga o le agamalu. O Iesu ua tietie o ia i le asini e faalia ai le ala maulalo ma le agamalu. Ua tietie Iesu i le asini ona latou taitai ai lea o le Asini agai atu i Ierusalem. Ua pepese tagata ma alalaga ma ua latou mulimuli atu i le asini o lo o tietie ai le Alii Faaola. Ua latou faapea atu – *“Osana i le alo o Tavita, ia manuia le afio mai i le suafoa o le Alii Osana i mea aupito i luga.”* Ina ua oo Iesu i Ierusalem ona fesilisili ai lea o tagata po o ai lea tagata. Ona faapea atu lea o le motu o tagata – *O Iesu leni le perofeta mai Nasareta i Kalilaia.*

O le tatou tala lena tamaiti. O le tietie atu o Iesu i le asini i Ierusalem o lana malaga faatupu lena. O le amataga foi lea o lona aga atu i ona puapuaga o lo o lumanai e ala i le satauro. O se aoaoga mo tatou. O Iesu na ia aumaia le ata o le agamalu ma le loto maulalo. Faapena tatou le fanau, ia tatou maua le agaga o le loto maulalo ma le agamalu. O ala ia tatou te maua ai le filemu ma le nofo lelei. O uiga ia o Iesu e tataua ona tatou faaaoao ai.

O le tietie o Iesu i le asini na faaiua ina tautau o ia i le satauro ona o le lalolagi agasala. Ia manuia tele outou le fanau.

Uiga o Upu:

Faaee: fola

Osana: Ia e faaola mai

GALUEGA FAATINO : Faafetaui upu nei ma o latou uiga (Matching)

Osana	O le aai o lo o iai le malumalu
Tamai asini	Ia e faaola mai
Ierusalema	O le faailoga o le agamalu ma le loto maulalo

PESE:

Osana pepese (tamaiti uma x3)

Osana pepese tamaiti uma

Ua afio mai le Tupu.

Ua latou fola (laupama i le ala x3)

Ua latou fola laupama i le ala

Ua afio mai le Tupu

Ua tietie atu i(Ierusalema x3)

Ua tietie atu I Ierusalema

I luga o le asini.

A'OA'OGA:

1. Ia tatou maua le loto maulalo
2. O Iesu na ia faaola i ai tatou.
3. Agamalu pei o Iesu



MALAGA FAATUPU A IESU

ASO SA: 21Aperila 2019

MATAUPU: E LE O IINEI O IA

SINI: Ia aoaoina le vasega ia malamalama ua leai se tino maliu o Iesu ona ua toetu manumalo o ia.

TUSI FAITAU: Ioane 20:1 - 18

FESOASOANI MO FAIAOGA:

O le aso Sa lenei lea ua tatou faamanatuina ai le toetu manumalo o lo tatou Alii Faaola o Iesu Keriso a Tamaiti? Faimai le tala o le uluai aso o le vaisapati i le vaveao. Na alu ai Maria le Makatala e asi le tuugamau o Iesu. Na vaaia e Maria ua leai se maa sa i le faitotoa o le tuugamau, ona ia tamoe atu ai lea ma vaai ai i totonu o le tuugamau, ua leai se tino maliu o Iesu. Ona toe tamoe lea o Maria ma ta'u atu i nisi o soo o Iesu o Simona Peteru ma le tasi soo na alofaina e Iesu. Ua latou o atu faatasi ma soo i le tuugamau ma iloa ai ua na'o ie na ufi ai le tino o Iesu a ua leai sona tino i le tuugamau.

Ua le mautonu nei soo ma Maria poo ai ua aveeseina le tino maliu o lo latou Alii o Iesu, o taimi ia Tamaiti e lei iloa e soo ma Maria o Iesu ua toetu manumalo o Ia mai le oti ma le tuugamau. Ua toe foi nei soo i lo la aiga, ao Maria ua nofo ai pea o ia i le tuugamau ma tagi ai. Ao iai Maria i le tuugamau ma le faanoanoa, sa ia faalogoina le leo o le tagata ua fesili atu ia te ia pe aisea ua tagi ai. E lei iloa e Maria o Iesu lea ua fesili atu ia te ia. Na faatoa iloa lelei e Maria o Iesu ina ua ta'u atu e Iesu lona igoa o Maria. Na matua faateia Maria ina ua ia tilotilo lelei atu o Iesu lea la te talanoa. Ua toetu o ia.

Ioe tamaiti ua leai se tino o Iesu i le tuugamau, ua leo iinei o ia i le tuugamau, a ua toetu o ia mai le oti. Na tamoe fiafia Maria ma ta'u atu i soo o Iesu ua toetu Iesu. O le tala fiafia lea mo i latou ae faapea foi le lalolagi atoa. E ui i puapuaga sa feagai ma Iesu ae lei mafai ona toilalo ai lo tatou Alii Faaola. O le maliu foi ma le toetu mai o Iesu, olona alofa ina ia faaolaina i tatou le fanau agasala. Ea la tamaiti??Pe faamata e talafeagai le agasala o le lalolagi ae oti ai fua Iesu?.

Uiga o Upu:

Vaisapati: o le aso muamua ina ua uma le sapati(aso toonai)

Ofu sisina : ofu papa'e

GALUEGA FAATINO: Faatumu avanoa o lo o i lalo?

Toetu, maa, Makatala, vaisapati, Simona Peteru, faateia, pogisa.

O le uluai aso o le 1 _____, i le taeao , ao 2 _____ lava, ua alu ane ai Maria le 3 _____ i le tuugamau. Ua ia vaai atu ua leai se 4 _____ sa i le gutu o le tuugamau. Ona ia tamoe lea ma ta'u atu ia 5 _____ . Ua tagi Maria ona ua leiloa poo ai ua aveeseina le tino maliu o Iesu. Peitai na 6 _____ Maria ina ua fetalai atu Iesu ia te ia, aua ua 7 _____ manumalo o ia mai le oti m le tuugamau.

TALI: 1. Vaisapati, 2. Pogisa, 3. Makatala, 4. Maa, 5. Simona Peteru, 6. Faateia, 7. Toetu.

PESE: Pese 51 (Pese & Viiga)

A'OA'OGA:

1. Ua toetu Iesu
2. Ua faaolaina le tagata agasala
3. Salamo ma faatuatua faamaoni.



TUUGAMAU AVANOA – UA TOETU IESU

ASO SA: 28 Aperila 2019

MATAUPU: UA TAGI IOSEFA

SINI: Ia aoaoina le vasega ia malamalama ua tagi Iosefa ona o lona alofa tele i nai ona uso ua latou toe feiloai.

TUSI FAITAU: Kenese 42: 5 - 24

FESOASOANI MO FAIAOGA:

Ina ua tupu tele le oge i Kanana i le nuu sa nonofo ai Iakopo ma lana fanau, ona latou o atu ai lea i Aikupito e faatau mai ai ni a latou meaai. O le taimi lea o lo o tele le meaai i Aikupito ona o le pule a Iosefa na ia faaputu mai ai saito mo le taimi o le oge. Ua oo atu uso o Iosefa i Aikupito, ma na iloa mai ai ai e Iosefa nai ona uso, ae lei iloa o ia e ona uso. Ua faataga fesili i ona uso poo fea e omai ai, ae lei faailoa ia ai e Iosefa.

Ua manatua e Iosefa ana miti sa fai ao latou nonofo faatasi ma ona uso i Kanana. Ua toe fesili Iosefa i ona uso pe leo i latou o ni tagata o lo o omai e vaavaai i le nuu o Aikupito ona o nisi tulaga. Peitai na tali manino ona uso, oi latou o atalii o le tagata e toatasi, na pau lava le mafuaaga na latou o atu ai o le faatauina o ni meaai mo i latou ma lo latou Tama o loo faatali mai. Ua saga fesili pea Iosefa i ona uso, ona tali mai ai lea o i latou – *“O au auaua ole uso e toasefulu ma le toalua i matou, o atalii o le tagata e toatasi i le nuu o Kanana, faauta foi oona po nei o i ai le uii ma lo matou tama, a o le tasi ua leai”*

Ua mana’o Iosefa e fia vaai i si ona uso laitiiti o Peniamina, o lea na ia faia ai le tonu i ona uso. Ina ia nonofo i le falepuipui. Ua mave aso e tolu ona tatalaina lea oi latou e o, ae nofo ai le toatasi ina ia mautinoa ai e Iosefa ia oo mai lona uso laitiiti ia te ia. Ua faalogo Iosefa i tala a ona uso ua latou faapea ifo, o lea ua toe tau mai e Iosefa la latou mea leaga sa faia ia te ia ina ua faatau ese mai o ia i tagata Mitiana. Ona alu ese ai lea o ia iai latou ma tagi ona o lona alofa i nai ona uso. E lei toe manatu Iosefa i mea sa faia e ona uso, a ua ia maua le loto faamagalalo ma faagalalo. Ua tupu tele lona alofa i nai ona uso, o lea na ia toe alu ae ai ma talanoa ma ona uso ma faailoa loa iai o ia o Iosefa.

O le tatou tala lena Tamaiti??o se aoaoga mo tatou – UA tagi Iosefa ona o le alofa i ona uso, ana le alu ese Iosefa mai ona uso, e le maua e ia le tulaga faaeaina ua iai. Ioe! E iai polokalame a le Atua mo tatou. Ia tatou maua le loto faamagalalo ma le loto alofa e pei o le tama lenei o Iosefa. Ae aua tatou te tau mai sui i nisi tagata. Ia manuia tele outou le fana

GALUEGA FAATINO: Tali mai i le sa’o poo le sese?

1. Sa malaga uma le fanau a Iakopo i Aikupito e faatau meaai? (sese)
2. Nai iloa lelei e Iosefa ona uso i le taimi na o atu ai? (sa'o)
3. Ua tagi Iosefa ona o le ita i ona uso ma le mea leaga na latou faia? (sese)
4. E tolu masina na falepuipui ai uso o Iosefa.(sese)
5. Na manao Iosefa ina ia aumai lona uso o Peniamina. (sa'o)
6. O le atamai tele o Iosefa na mafua ai ona tofia e pule. (sese)

PESE: Iosefa (Fati : Lets all get together...walk in the light)


1. O Iosefa le tagata sa fai ma pologa
Faaeaina ma aumaia le saolotoga
O le agaga o le Atua sa fai ma taitai
Laveai o ia mai lima o Satani

TALI: Le oge ua tetele naua
Iosefa Tautai i aso faigata
Faasoaina o mea taumafa
Mo Aikupito ma Kanana.

2. Talofa i le sailiga i nuu mamao
Lilo i manatu le uso sa i le vao
Le loto ua nutimomoia i le alofa
Ai o se mafuaaga mai le Atua

A'OA'OGA:

1. Ia maua le loto faamagalo.
2. Aua le tau'i ma sui.
3. Alofa i uso a tagata.



UA TAGI IOSEFA I LE ALOFA I ONA USO

MANATU TAIALA O ME : TINA O LE TALALELEI

E le toe tau faailoa le taua o Tina i totonu o aiga, o le manatu taiala lena o lenei masina. E faataua ai le sao o tina aua le fautuaina o aiga, nuu aemaise o le Ekalesia. Ua aumaia nisi o Tina o le Tusi Paia e fai ma aoaoga lelei mo le taua o Tina. O le tina lava e sili ona latalata i fanau i soo se itu, ma e tele foi ona tiute faatino mo le tausaiaina o le aiga.

ASO SA: 5 Me 2019.

MATAUPU: O LE U’U MANOGI.

SINI: Ia a’oa’oina le vasega ina ia iloa le tāua ma le taugata o le uu manogi na foa’i mo le Alii o Iesu.

TUSI FAITAU: Ioane 12:1-8.

FESOASOANI MO FAIAOGA:

O le uu e mafai ona faamatalaina o se suauu ua faapitoa mo le tino. Ua iai lava le uu poo le faguu a Samoa lava ia, e gaosia mai le popo, faatasi ma nisi o lau laau ma fugalaau manogi ua tuu iai, ina ia sasala ma tosina lona manogi. E aoga tele le uu poo le faguu i tino o tagata, aemaise lava i tamaiti faapei o tatou.

Peita’i o le uu o loo faaaogaina i le tala o lenei taeao, e faamatalaina o le faamanogi (perfume). E faaaogaina e faamanogi le tino, ina ia tosina ma fiafia ai nisi tagata latou te faalogoina se manogi manaia. E ui la i le eseese o u’u manogi ma o latou sasala, peita’i o le u’u manogi o loo iai le mataupu o lenei Aso Sa, o se u’u ua uiga ese lona sasala i lona manogi. E le o faamatalaina lea tulaga i le tatou tala ma le tusi faitau. Peita’i, e mafai ona o tatou iloa ma faamatalaina lenei u’u manogi i sona manogi uiga ese ma lona sasala, i le manatu o Iuta le soo faalata, ose u’u e ese lona taugata. A taugata se oloa, o iina o loo ta’u mai ai le tulaga (quality) o le na oloa. O lona uiga afai e manatu le au soo, o le u’u taugata, e leitioa foi la a manumanu, ina ua sasa’a e Maria e mulumulu ai vae o Iesu. Leaga o le u’u e taugata lona tau, ona o lona manogi.

Ae mo Maria lava ia, ua ia manatu ina ia foa’i ma faaaoga mo lona Alii o Iesu. O se faiga o loo atagia mai ai le tagata ua ia ave mea sili mo lona Alii. E mafai foi ona faapea, o le foa’i ua faia e Maria e ala i le u’u manogi na ia foa’i mo Iesu, o lana taulaga lava lea i le Atua.

O mea tāua ma taugata i so tatou manatu, o mea ia e tataua ona o tatou faaaoga mo le finagalo o lo tatou Alii. Tatou te le o mafuta ma le Alii i le vaaiga o mata. Ae mafai ona o tatou iloa i o tatou mata, ina ua o tatou foa’i mo le manuia o nisi o loo fia maua se fesoasoani.

GALUEGA FAATINO:TALIGĀ FESILI

1. O ai e ana le u'u manogi o loo i le tala?

Tali: O Maria.

2. Aiseā ua faamaumau ai le u'u manogi?

Tali: Ua u'u ai vae o Iesu.

3. Aiseā na fesiligia ai e le au soo le galuega a Maria na faia i le uu?

Tali: Manumanu i le uu, ona e taugata.

4. O ai le igoa o le soo na ia fesiligia le galuega na faia e Maria ia Iesu?

Tali: O Iuta le Sekara.

PESE: Suauu i la'u lamepa ia mu pea.

A'OA'OGA:

1. Ua foa'i e Maria le uu manogi taugata mo lona Alii o Iesu.

2. O le foa'i atu mo le Alii, ia faia ma le loto atoa.

3. Aua le aiā fua i le galuega ua faia e le isi tagata.



UA U'U E MARIA VAE O IESU

ASO SA : 12 Me 2019.

MATAUPU: UA FAIA E LE ATUA EVA

SINI: Ia a’oa’oina le vasega ina ia iloa le mafuaaga na finagalo ai le Atua ina ia faia Eva.

TUSI FAITAU: Kenese 2:18-25

FESOASOANI MO FAIAOGA:

O Eva o le ulua’i tinā na faia e le Atua i le amataga. Ina ua uma ona faia o le tamāloa, ua silasila atu le Atua ua lelei. Peita’i, e tatau ona iai se isi la te to’alua. E le lelei ona to’atasi o le tamāloa, ma e tatau lava ona iai se isi e fai ma fesoasoani. O le mafuaaga lena na faia ai loa e le Atua o le fafine. E le gata ina ia to’alua ma le tamāloa i le faatinoina o feau, i le tausaiaina lea o mea uma o le foafoaga e pei o laau ma meaola uma e pei o manu vaefa, o manu fetolofi ma soo se meaola na faia e le Atua, a ia fai foi ma fesoasoani i nisi o feau faatino.

O loo manino ma iloa, o Atamu o le tamāloa na ulua’i faia e le Atua, ona faia loa lea o le fafine. O le mataupu e 3 fuaiupu e 19 o le tusi o Kenese, o loo manino mai ai, na faaigoaina e Atamu lana avā ia Eva. O lona uiga, o le fafine na faia e le Atua, na faia lava ma le mafuaaga e pei ona tāua. Ia fai ma avā a Atamu. Ma o le uiga foi lea o le igoa o Eva, “o le ola”. O le finagalo tonu lava lea o le Atua na faia ai Eva, ina ola ai le lalolagi, e ala i le fanafanau ma ia uluola, ma ia tumu ai le lalolagi, e pei ona faamauina i le Kenese 1 fuaiupu e 28.

Ua iloa la ma ua manino, i le tāua ma le aoga na faia ai e le Atua le fafine o Eva. Muamua, ina ia fai ma tinā, e tutupu mai ai nisi tagata se to’atele, ina ia tumu ai le lalolagi. O lona lua, ina ia fai ma fesoasoani i le tamā, i le mafutaga i totonu o le aiga. O lona tolu, ina ia faufautua i le tamā i taimi e tutupu ai ni vevesi i le va o le isi i le tasi, i le ma le tele o isi matāfaiaoi aoga ma tāua e o le tina i totonu o soo se siosiomaga.

GALUEGA FAATINO: Saili mai upu nei i totonu o le paso?

1. EVA, 2.FESOASOANI, 3.AVĀ, 4. FAFINE, 5. TINĀ


D	N	A	S	T	G	Y	S	M	I
F	V	A	G	G	K	F	U	N	P
A	P	U	A	O	F	E	A	H	F
T	U	L	T	E	M	O	F	K	E
H	R	A	G	S	S	H	B	A	K
L	R	O	S	A	E	M	A	A	U
G	A	T	O	T	V	K	N	F	L
G	K	S	E	F	G	E	I	G	A
H	E	O	F	V	L	R	T	R	O
F	M	T	E	N	I	F	A	F	T

PESE: O ai na fau le vaa.

1. O le ulua'i Tina.
 Eva, x2
 le ulua'i Tina
 Eva le ulua'i Tina.
2. O le uiga o le igoa o Eva
 le Ola (x2)
 ai na faia o Eva
 le Atua na faia o Eva.

A'OA'OGA:

1. O le finagalo o le Atua na fai ai Eva.
2. O Eva o le ulua'i Tinā i le tala o le foafoaga.
3. O le Tinā, o le fesoasoani i totonu o le aiga.



UA FAIA E LE ATUA EVA

ASO SA: 19 Me 2019.

MATAUPU: O HEROTIA

SINI: Ia a’oa’oina le vasega ina ia iloa ma malamalama i le tagata e igoa ia Herotia, ma le leaga o lana mea na fai.

TUSI FAITAU: Mareko 6:14-29

FESOASOANI MO FAIAOGA:

O Herotia o le āva poo le to’alua o Filipino le uso o Herota, lē sa fai ma tupu o Iutaia. Ina ua oti Filipino le to’alua o Herotia, ona mana’o ai lea o Herota la te nonofo. Peita’i na le mafai Ioane, ona o loo iloa lelei e Ioane le tagata o le Atua, e le fetau le toe nonofo o Herota ma Herotia ona o le avā a Filipino lona uso.

O le mafuaaga lea na ita ai Herotia ma ua saili se auala ina ia faao’o ai le oti ia Ioane le papatiso. O lagona o Herotia i le fia faao’o le oti ia Ioane, o loo faaalua ai lona loto ina ia nonofo ma Herota. O le manumalo foi o faaososoga i lona loto, na ia matuā saili ai lava ise auala e faao’o ai le oti ia Ioane. E le gata foi i lea, a’o lona faaaogaina o si ana tama teine, e fai ma auala e nate maua ai Ioane le papatiso, ina ua ia tapena lana tama teine e faafiafia i luma o le tupu.

O le fesili atu o le tama teine i lona tinā o Herotia i se mea e mana’o ai e pei ona faatonuina e le tupu, o se fesili e le tau sailia sona tali, leaga ua leva ona sailia e Herotia se auala, e na te faaoo ai le oti ia Ioane le papatiso.

O Herotia la, e lē ose tagata e lelei lana amio. O se tinā e leaga lana mea sa fai, ona ua le gata ua aafia ai le ola o Ioane le auaua a le Atua, a’o lona faaaogaina foi o lana tama teine, e maua ai se avanoa e faao’o ai le oti i le auaua a le Atua. O se faata’ita’iga leaga ua faia e lea tinā i lana tama teine. O se feau aoga foi mo i tatou uma o le fanau, ina ia o tatou toaaga e tatalo i le Alii e fesoasoani mai mo i tatou, e mafai ai ona fetuutuuna’i o tatou lagona, tatou te filifili ai mea e aupito sili ona lelei ma aoga mo lo tatou ola, aemaise o faatonuga sese e tuuina mai e nisi ia’i tatou.

GALUEGA FAATINO: TUSIGA SOLO

Tusi se solo e faatatau ia Herotia. Ia lua i le tolu fuaiupu, ae ia ta’i fa laina i le fuaiupu. Ia atagia ai uiga leaga o Herotia ma lona naunau ina ia faao’o le oti ia Ioane le papatiso.

(faata’ita’iga)


1. *O Herotia ose tinā leaga.
E taulamalama toe fia tagata
Sa ia saili se ala ma se mafuaaga
E faao'o ai le oti ia Ioane le papatiso i tagata.*

2. *Ua faia e Herotia se faata'ita'iga lē lelei
I le ola o tupulaga i aso nei
Ua ia tetee i le faaiuga amiotonu ma sa'o
Ae naunau ina ia faataunuu lona mana'o*

PESE: Tulei ese.

AOAOGA:

1. Aua le ola taulamalama e aafia ai le ola o le isi tagata.
2. Ia lelei le amio.
3. Aua le tetee i faatonuga lelei.



HEROTIA MA SALOME

ASO SA: 26 Me 2019.

MATAUPU: FAFINE PEPELO

SINI: Ia iloa ma malamalama lelei tamaiti, ua toe faamanatu mai lenei tala i le leaga o le ola pepelo.

TUSI FAITAU: 1 Tupu 3:16-27

FESOASOANI MO FAIAOGA:

O le tala i lenei taeao, o loo toe faamanatu mai ai le leaga o le ola pepelo. O le pepelo, e afaina ai isi tagata, ma o le iuga foi o le tagata pepelo, e le lelei. O le faatamala foi o le tagata, e mafua ai ona maua le avanoa o le ti'apolo, e faaaogaina ai le pepelo e fai ma fofō ose faafitauli. O le faatamala ma le lē magafagafa lelei o le tinā na pepelo, na mafua ai ona oo le oti i si ana pepe, ina ua ia tatao i lana lava pepe, a'o momoe i le po. Ua le gata i le lē magafagafa lelei, ae ua avea le oti ai o lana pepe i lona faatamala, ma ala ua ia faia ai se gaioiga sese, e ala lea i lona faafesuia'i o lana pepe ua oti i lona faatamala, ma le pepe a le tinā o loo mataala i le vaaiga o lana pepe. O loo manino lava le tala, ma le faamasinoga sa faia e le tupu o Solomona.

E ui lava la i le tala, o loo faaalua ai le tulaga o Solomona i totonu o le nuu ma lona faamasinoina o le nuu i lana faamasinoga poto, ae mo le tala lava ia o lenei Aso Sa ma le mataupu, o loo aga'i lava i le fafine poo le tinā pepelo, e pei ona atagia ai nisi uiga lē lelei, e pei o le nei:

1. Gaoi: ua ia gaoi i le pepe a le fafine o loo moe, ae faafesuia'i ma lana pepe ua oti talu lona faatamala.
2. Pepelo: Ua pepelo i luma o le Tupu, ma ua finau pepelo i le taimi o le faamasinoga poo ai tonu e ana le pepe o loo ola.
3. Lē Alofa: Ina ua fai atu le tupu e vaelua pe isi lua le pepe o loo ola, ina ia tofu le fafine ma le pepe, sa ia lagolagoina ina ia faataunuu. Ua leai se alofa i le ola o le pepe o le a maumau pe a vaelua.

O le mataupu lava o lenei Aso Sa, o le "Fafine Pepelo" o loo atagia mai ai le tele o le aafiaga ai o isi tagata, talu le pepelo. O loo faamanatu mai e lenei tala, e leaga le ola pepelo, ona e oo lava ona o'o o'oga i le maumau ai o le soifua. E le gata i lea, ae o le pepelo foi, e mafua ona ua leai se alofa. Ae sili ai, e mafua ona pepelo le tagata, ona ua lē manatua le Atua.

GALUEGA FAATINO: "TALA FAATINO"

E lelei ona faatino le tala lenei i le vasega, faaopoopo iai ma le fesoasoani susuga i faiaoga. Afai foi e to'atele le vasega, e manaia ae vaevae le vasega i vaega, ae tuu iai ina ia fai poo ai e sa'o ma lelei le faatinoina.

PESE: (fati: O oe la lea o le fafine faitala : Aniseto Falemoe)

1. O oe la lea o le fafine leaga
Ua ova lou pepelo, amio leaga
Ua tupu le vevesi talu lou faatamala
Ua maumau ai le ola o si au tama.

Ch: E mata ataata nai ou foliga

A o le pepelo ua faafoliga
Mana'o i le pepe a le isi aiga
Tupu le vevesi ua fai o le misa
Tuu le pepelo ma lou le alofa
O le iuga lava o le ola pologa

AOAOGA:

1. E leaga le ola pepelo.
2. E tupu le pepelo ina ua e lē alofa.
3. Aua le faatamala i le ola.



SOLOMONA MA FAFINE E TOALUA

MANATU TAIALA O IUNI: FAAMAONI

O le upu ua masani ai – *faamaoni i mea iti e tofia ai e pule i mea e tele*. O le faamaoni o se mea taua i le olaga tuputupu a’e o le fanau. E manuia ai le ola o le tama ma le teine talavou. A faamaoni le tamaitiiti ao laitiiti e mautinoa lava le taunuu manuia o lona ola. Aua o lona faamaoni o lona faia lava lea o le finagalo alofa o le Atua.

ASO SA: 2 Iuni 2019.

MATAUPU: TALA IA KONELIO

SINI: Ia a’oa’oina le vasega ina ia malamalama i le tagata e igoa ia Konelio, faatasi ma lana amio na fiafia iai le Alii.

TUSI FAITAU: **Galuega 10:1-8**

FESOASOANI MO FAIAOGA:

“O Konelio, o le ta’ita’i o le to’aselau o le au a Italia”. Ua lava lea fasi fuaitau tatou te iloa ai, o le tagata e igoa ia Konelio, o le ta’ita’i au a le malo o Roma, i le vaitau o le tau amata o le ulua’i Ekalesia o tagata Kerisiano faamaoni i le lalolagi. O i latou ia sa fai ma faalavelave i mafaufauga o le au Kerisiano, ona o le vaitau o le sauāina o le au Kerisiano.


O lona tulaga i totonu o le sosaiete o tagata o le malo, e maualuga leaga o ia o le ta’ita’i au. Peita’i, sa le avea lona tulaga i totonu o le malo, e toe suia ai lona talitonu i le talalelei ia Iesu Keriso, o ia faatasi ma lona aiga. O le tagata e amio Atua, ona o loo tatalo i le Atua i Aso uma, ma o le ala foi lea o lona mata’u i le Atua. O loo matuā manino mai foi i le tala i lona faamatalaina, le faaaogaina o lona tagata e le Alii, e auala atu ai le feau o loo ia finagalo iai.

Ioe! E fesoota’i le Atua i le tagata e mafuta atu ia te Ia. E le avea foi le tulaga i totonu o le li’o o tagata, e faamaualuga ai ma galo ai le Atua, o le na valaauina ma filifilia le tagata i soo se tofi. O ia lea na filifilia e le Atua ina ua auina iai le ave feau poo le agelu ina ia auina atu nisi i le nuu o Iopa e aami ia Peteru. O le faamoemoe o le Atua i le vaitau o le faasalalauina o le talalelei i le lalolagi, aemaise le vaitau o le ulua’i Ekalesia, ma le tau sailia o tagata latou te molimau i le talalelei ia Iesu Keriso.

E ui o Konelio o le ta’ita’i o le to’aselau i le au tau a Italia, ma o ia foi ma lona aiga o tagata o nuu ese, ae na le avea ma ala e aveesea ai le filifiliga a le Atua, ina ia faaaoga e auala mai ai lona finagalo i tagata.

GALUEGA FAATINO: ATA FAAMATALA

Faavasega poo fea tonu upu ma faaupuga talafeagai e faamatalaina ai lenei tagata o Konelio, e pei ona faamatalaina. Aveese upu ma faaupuga e le feataui ma le olaga o Konelio.



PESE: A tumau ia Iesu. (Pese Aoga Aso Sa)

AOAOGA:

1. Ia mata'u i le Atua faapei o Konelio.
2. E faaali mai le Atua i le tagata e mafuta atu ia te Ia.
3. O Konelio o le ta'ita'i lelei.



KONELIO LE TAITAI AU

ASO SA: 9 Iuni 2019.

MATAUPU: UA PIPILI MEFIPOSETA

SINI: Ia malamalama le vasega i le mafuaaga na mafua ai ona pipili Mefiposeta.

TUSI FAITAU: 2 Samuelu 4:4

FESOASOANI MO FAIAOGA:

O Mefiposeta, o le atalii o Ionatana. A’o Ionatana, o le atalii o Saulo lē sa fai ma tupu o Isaraelu. Ina ua oo mai le tala ua fasiotia Saulo ma Ionatana, ona popole ai lea o lē na tausia le tama o Mefiposeta. O le mea ua tupu, o le oo mai o le tala faanoanoa, ma ua ose tala faapopole loto i lē na tausia pe na vaaia le tama o Mefiposeta. Ua ia manatu ai, e sili ai lona sola ese ma ave le tama o Mefiposeta, leaga ua leai sē na ia malu ai. Ai lava ua ia manatu, ua oo mai le malaga a le maliu ma le oti i le aiga o Saulo, ma o le iuga foi lea o le a oo i le tama, faapea foi ma ia.

E le o faamatalaina i le tala le mafuaaga ua faia ai e lea auauna le gaioiga lea o le sola ese mai ma aveese mai le tama o Mefiposeta. Peita’i, o le faia o lea gaioiga, na mafua ai ona paū le tama, o loo matuā manino mai ai le popole ma le atuatuvaale o le auauna. E le gata i lea, ae o le mea ua faia e le auauna i si nei tamaititi faatoā lima tausaga, i le taumafai lea e aveese, ona o le tala ua aumai, e mafai ona o tatou manatu, o loo taumafai lea auauna, ina ia aveese mai le tama o Mefiposeta, ina ne’i afaina ma faao’o iai e nisi le oti, auā o lea ua feoti Ionatana lona tamā, ma Saulo le tamā o lona tamā (grandfather). Ma o le mafuaaga lea na paū ai le tama o Mefiposeta i le lima ai o ona tausaga. O le paū ai la o Mefiposeta, o le mafuaaga lena o lona pipili.

O le pipili ai la o Mefiposeta, ua le ose faatamala o ia lava. E mafai ona tatou manatu i le faatamala o lē na nafa ma le tausaiaina o le tama, na mafua ai ona paū ma avea ai ma tama pipili. Ae a manatu lava iai i gaioiga a le auauna, o loo matuā manino mai ai le loto popole o le auauna, faatasi ma lona alofa i le tama o Mefiposeta. Auā ana le alofa, semanū lava e sola na o ia, ae tia’i le tama.

GALUEGA FAATINO: TALA TOE RIPOTI.

O lea ua tuuina atu ripoti a televise faasalalau e lua e pei ona iai le EFKS TV ma le TV 3. O le avanoa lena e tuuina atu i le vasega, latou te faia ma saunia se ripoti mo Tala Fou a le TV 1. E lelei lava le saunia o le ripoti a le tagata lava ia, ma ia tuu iai le avanoa e nate faasalalauina ai lava lana ripoti, e fua i lona iloa ma lona malamalama i le tala sa faamatala.

O le aso analeila, na oo mai ai se tala faanoanoa i le nuu o Isaraelu, ina ua fasiotia e Filisitua lo latou tupu o Saulo, faatasi ma lona atalii o Ionatana. O le oo mai la o lenei tala faanoanoa, na popole ai lē na tausia Mefiposeta le atalii o Ionatana, ma ua taumafai ai loa e sola ese ma le tama. O le taumafai ai la o lea auaua e sola ese ma le tama, na faafuase'i ai ona pa'ū le tama, ma faaleagaina ai ona vae,

EFKSTV

O le afiafi o le Aso ananafi na lipotia mai ai e tatou tala fou, le pa'ū ai o le tama o Mefiposeta le atalii o Ionatana, ina ua faatamala le tama'ita'i tausitama. O le faaaliga a lea tama'ita'i, o lona tago atu e afisi mai Mefiposeta la te sosola ina ua oo mai le tala ua maliliu uma Saulo ma Ionatana i le taua, na see ese ai ma ona lima le tama, ma i'u ai ina pa'ū ma gau'i uma ai ona vae. Ua lipotia mai ai foi e foma'i, ua le mafai lava e le tama ona toe savali, ua pipil.i

TV 3

PESE: (fati: Go tell Him on the mountain)

1. Talofa e i le tama
Ua pa'ū lava talu le faatamala
Talofa e isi tama
Ua pipili talu ai le auaua

2. O Mefiposeta o le tama
Na pu'ū i le lima o ona tausaga
Ua fai ma mafuaaga
O le pipili, i lona olaga.

A'OA'OGA:

1. Aua le popole vale, e tupu ai faafitauli.
2. Aua ne'i afaina nisi ona o so tatou faatamala.



AUAUNA MA MEFIPOSETA

ASO SA: 16 Iuni 2019.

MATAUPU: FAAOSOOSOGA MUAMUA

SINI: Ia a’oa’oina le vasega ina ia iloa ma malamalama i le faaosoosoga muamua na faaosoosoina ai le Alii o Iesu e le agaga.

TUSI FAITAU: Luka 4:1-4

FESOASOANI MO FAIAOGA:

O le faaosoosoina o le Alii o Iesu, ose taumafaiga na finau ai le alii o le lalolagi, ina ia taofia ai Iesu mo le faatinoina o lana galuega na afio mai ai i le lalolagi. E le gata i lea, ae ua avea ose taumafaiga ina ia toilalo ai le Alii o Iesu

O le mataupu lava la o lenei Aso Sa, o loo faamamafa lava i le faaosoosoga muamua o Iesu, e pei ona faaaogaina ai le “meaai”. Ua iloa lelei e le tiapolo, ua fasefulu aso e le’i tausami le Alii o Iesu. Ma ua lagona foi e Iesu lona fia ai. O le ala tonu lea na tofotofa ai e le tiapolo le Alii o Iesu, ina ua fai atu, “afai o oe o le Alo o le Atua ina fetalai ane ia i lenei maa ia liu areto”. O le manatu o le tiapolo, e faamoemoe le Alii o Iesu i le meaai e ola ai. E le gata i lea, ae o loo iloa lelei foi e le tiapolo, o le meaai, ua tele ina faaseseina ai le to’atele o tagata, ma ua sese ai faaiuga fai a le to’atele o tagata.

O le tali mai a Iesu i le tiapolo, o loo matuā manino mai ai lona manumalo i le faaosoosoga muamua. “E le na o meaai e ola ai le tagata” o lona uiga i le finagalo o Iesu, e sa’o e ola le tagata i le meaai, ae mafai foi ona ola e aunoa ma le meaai. O le ola o le tagata, ia aua lava nei faamoemoe i le meaai. To’atele nisi o tagata ua atua po ua faamuamua i le sailiga o le meaai e faamalieina ai. Peita’i o le tala i lenei Aso Sa, o loo faamanatu mai ai, ina ia aua lava le faaseseina gofie, pe faaosoosoina gofie lo tatou ola i meaai, ae mafai e le faatuatua ma le faamoemoe i le mana o le Atua soifua, e nate fafagaina lo tatou ola faa-le-Agaga i Aso uma.

GALUEGA FAATINO: TALIGA FESILI

1. O le a se mea na faaaoga e le tiapolo e faaosooso ai le Alii o Iesu?

Tali: O le meaai.

2. Aisea na faaaogaina ai le meaai e faaosooso ai le Alii o Iesu?

Tali: Sa iloa lelei e le tiapolo, ua fa sefulu aso e lei tausami Iesu.

3. O le a se mana’o o le tiapolo i lona faaosoosoina ai o Iesu?

Tali: Fia iloa pe faamuamua e Iesu le meaai.

4. O le a le uiga o le tali a Iesu i le faaosoosoga a le tiapolo?

Tali: O loo faamanatu e Iesu, e le na o meaai e ola ai le tagata, o lona uiga ina ia au le faamuamua i le mafafau le meaai.

PESE: Lo'u Atua e, ua ou fia ai ia e fafaga ia te a'u. (pese Aoga Aso Sa)

A'OA'OGA:

1. E leaga le tau faaososo i le isi tagata.
2. Aua le na'o meaai.
3. O Iesu o le Faaola, i taimi uma.



FAAOSOOSINA IESU INA IA LIU ARETO MAA

ASO SA **23 IUNI 2019**

MATAUPU: **UA PA'Ū TAKONO**

SINI: Ia a'oa'oina le vasega ina ia iloa ma malamalama ia Takono, ma le mafuaaga na pa'u ai.

TUSI FAITAU: 1 Samuelu 5:1-6

FESOASOANI MO FAIAOGA:

O Takono, o le isi lea faatagata sa fai ma atua o tagata Filisitia. E tele atua mamate poo atua e leai ni ola, sa tapua'i ai tagata Filisitia, e pei o Takono. O Takono foi, e iai lava le fale faapitoa sa faatuina ai i totonu o le nuu o Filisitia.

Ina ua faiaina le au tau a Isaraelu ia Filisitia, na o latou ave ai le atolaau a le Atua sa ia Isaraelu, ma tuu i tafatafa o lo latou atua o Takono. Ae manatua foi, o le atolaau a le Atua, o le faailoga o le auai o le Atua ia Isaraelu. E mamalu ma silisiliese, ma e le soona fia ulavale iai soo se tasi. O le mafuaaga foi lea ua faailogaina ai i latou e mafai ona o latou fetagofi ma pa'i iai. A'o lea ua fao e tagata Filisitia, ma tuu i le fale o loo iai lo latou atua o Takono. O se vaaiga fou i tagata o Filisitia, ina ua usu atu i le tasi o taeao, ae vaaia lo latou atua o Takono o loo pa'ū fao i luma o le atolaau a le Atua. Peita'i e leai se tasi sa i totonu o le fale o loo tutu ai Takono. E le gata i lea, ae o le nofoaga foi o loo iai, o totonu o le fale, e le o agi iai se savili, e mafua ai ona pa'u.

E ui ona e le o ta'ua e le tusi faitau le mafuaaga na pa'u ai, a'o fesili ma mafaufauga e tutu, pe a faafeagai le mamalu o le Atua silisiliese o le Atua soifua, ma atua faatagata mamate o i latou o loo ifo iai. O loo manino lava le tala, na faalua ona pa'u Takono, ina ua toe faatuina e i latou na tau atu iai. O le pa'u faalua ai o Takono, na malepe ai ina ua motu ese lona ulu, faatasi ma ona tapulima ua motusia uma.

O le fesili o loo tula'i mai, “O LE A SE MAFUAAGA UA PA'Ū AI TAKONO?”

E pei ona faailoa atu, e le o ta'ua e le tusi faitau le mafuaaga na pa'u ai Takono le atua mate o le au Filisitia. Peita'i, e mafai ona o tatou faapea, ua mafua ona pa'u Takono, ina ua feagai ma le mamalu o le Atua, e ala i le atolaau. Ia pe faapea foi, ua mafua lea tulaga, ina ia faailoa i tagata ifo i tupua o Filisitia ma le lalolagi uma, e leai lava se isi Atua soifua e mamalu ma silisiliese faapei o Ia, le Atua o Isaraelu, le Atua o lē na faia le lagi ma le lalolagi, se ia oo lava i le tagata, o Ia lea o loo tatou ifo ma tapua'i iai.

GALUEGA FAATINO: **TALIGA FESILI.**

1. O ai Takono?

Tali: O Takono o le isi lea faa-tagata sa fai ma atua o tagata Filisitia.

2. Aisea na fao ai e Filisitia le Atolaau a le Atua?

Tali: Ina ua o latou faato'ilaloina Isaraelu ma lana au tau.

3. O fea sa o latou tuuina ai le Atolaau?

Tali: Sa tuuina i le fale o loo tutu ai Takono.

4. E faafia ona pa'u Takono?

Tali: E faa lua (2)

5. O le a sou iloa? O le a le mafuaaga na pa'u ai Takono?

Tali: (Tatala le avanoa e faaali mai ai lagona o le vasega, ini mafuaaga talafeagai na mafua ai ona pa'u faalua Takono, e tusa ma le tala sa faamatalaina)

PESE: Pese 11 (Tusi Pese EFKS)

A'OA'OGA:

1. Aua le ifo i tupua.

2. E silisiliese ma mamalu le Atua soifua o loo tatou tapua'i iai.

3. Ia tau lava o le Atua soifua tatou te tapua'i iai.



UA PAŪ TAKONO

ASO SA 30 IUNI 2019

MATAUPU: O LE FALE TATALO

SINI: Ia a’oa’oina le vasega ina ia iloa ma malamalama i le taua o le Fale Tatalo, ma le amio e tatau mole fale tatalo, ona o le fale ua faapitoa mo tapua’iga ma sauniga i le Atua.

TUSI FAITAU: Mataio 21:12-16

E tele igoa ua faaigoaina ai e le tatou gagana le fale tatalo, e pei o le malumalu, o le falesa, o le maota tapua’i, ma le fale lotu. O le fale ua faapitoa mo tapua’iga ma sauniga lotu i le Atua. O Ierusalem, o le nofoaga lea sa faatuina ai le malumalu poo le fale tatalo o tagata Isaraelu, lea ua fai ma fale tatalo o tagata Iutaia. O le fale lea sa fai ma ioimata poo le fale faapelepele o tagata Isaraelu, a’o le’i faataapepeina. O le fale sa manatu soo se tagata Isaraelu, o le nofoaga o loo afio ai le Atua. Ma o le ala foi lea poo fea lava e alu iai soo se tagata Isaraelu, tau lava o le faasaga i Ierusalem le nofoaga o loo iai le malumalu, ona manuia lea.

Lea ua oo mai i le taimi o Iesu, ae tupu ai loa le faafitauli, e pei ona iai le mataupu o lenei Aso Sa, ina ua oo atu le Alii o Iesu i le malumalu, ua fai ma maketi i nisi o tagata. Ua faaaogaina le fale tatalo e fai ma fale o fefaataua’iga o oloa. O le mafuaaga lea o le lē fīafia o le Alii o Iesu, ona o le fale lava ia lea, o le fale mo le tagata e fesoota’i ai i le Atua e ala i tapua’iga ma sauniga. O le ita tele o le Alii o Iesu, o le mafuaaga lea o lona tutulieseina o i latou sa fatau a latou oloa, tulei i lalo laulau ma mea sa o latou faaaogaina, ona o le fale o lona Tama, o le Atua lea. O le uiga o le fetalaiga a Iesu, o le fale o lona Tama, ona o sauniga lotu e fai, e fai aga’i i le Atua. O le faaaogaina foi e i latou o le fale tatalo e fatau ai a latou oloa, o loo atagia mai ai lo latou le talitonu i le Atua, faatasi ai ma lo latou teena o le Alii o Iesu. E le gata i lea, a’o le mea sa o latou faia, o loo atagia ai le leai o ni mafaufau, faatasi ma lo latou le ava i le Atua.

E to’atele foi nisi o i tatou o loo fai le fale tatalo poo le falesa, ma fale e taalo ai ma pisapisao ai i taimi o sauniga ma tapua’iga. O nisi foi, ua fai le fale tatalo ma fale e momoe ai pe a fai sauniga lotu. E le gata i lea, a’o nisi foi ua fai ma fale e aai ai. O lona uiga, o le mataupu o lenei Aso Sa, o loo faamanatu mai ai ia’i tatou, e le fīafia le Alii o Iesu pe afai tatou te le ava ma amio faaaloalo i totonu o le fale tatalo, poo le malumalu o le Atua.

GALUEGA FAATINO: TUSIGA ATA.

Tusi mai le ata o le faatulagaina o totonu o le tou lava falesa.

O le galuega faatino lenei ina ia faamanatu ma faailoa i tamaiti le taua o le faatulagaina (set up) o totonu o le fale tatalo poo le malumalu tapua’i. O le to’atele lava o fanau, ua na o le vaai i le pulelaa ma le laulau mo le faamanatuga, ae le o iloa le taua e tusa o talitonuga ua lima ta’ita’iina ai le Ekalesia EFKS.

E ogatotonu lava le la'oai o le Talisuaga Paia a le Alii, poo le laulau o le Faamanatuga. E iai nisi o falesa e eseese tulaga o pulelaa. O nisi e tulimanu, a'o nisi o le ogatotonu, i tua atu o le la'oai poo le laulau Faamanatuga.

O le talitonuga, poo fea lava e faatuina ai le pulelaa, e ogatotonu lava le la'oai poo le laulau o le Faamanatuga, ona o le mafaufauga, o le Talisuaga Paia a le Alii, poo le Faamanatuga o loo tafe mai ai manuia.

PESE: 193 (PESE MA VIIGA)

A'OA'OGA:

1. Ia amio pulea ma fa'aaloalo i totonu o le fale tatalo poo le malumalu.
2. O le falesa poo le fale tatalo, e mo tapua'iga i le Atua.
3. Ia toaga e tatalo i taimi o sauniga i le fale tatalo.

MANATU TAIALA O IULAI : OLA VIVII I LE ATUA

O le ola vivii i le Atua e pei ona fai ma manatu taiala o lenei masina, aua ua mafai ai ona tatu faamatalaia ai ni lagona lelei ma le fiafia oi totonu ia i tatou, ona o le agalelei ma le alolofa mai o nisi tagata ia i tatou. Ole ola vivii ile Atua, o se lagona faale-Atua e faailoa atu ai le faamalieina ole loto ma le mafaufau i le alofa mai. Ia manuia tele galuegaolenei masina.

ASO SA: 7 Iulai 2019

MATAUPU: UA TATALO TANIELU

SINI: Ia aoao tamaiti ia malamalama leleioletoaga e tatalo ma le talitonu faamaoni i le Atua, o a lava ni faafitauli e fetai ai ma i tatou e laveaiina lava i tatu e le Atua.

TUSI FAITAU: Tanielu 6:1 – 10

FESOASOANI MO FAIAOGA

O le tusi faitau (Tanielu 6), o se fesoasoani mo lou silafia e lau Susuga i le Faiaoga o le atoaga o lenei tala, aemaise o le mataupu ua a'oa'o mai. E le tau ina faitau e le vasega, po o le taimi foi o le faatinoga. Ua o se tapenaga mamao a Lau Susuga e faitau ai ma malamalama i le tala atoa.

O Tanielu o se tama e tulagaese lona atamai. O le mafuaaga foi lena na avea ai o ia ma alii sili i malo na pulea e le tupu o Tariu. Ia manatua foi o Tanielu o le tagata sa faatafea aua o le Iutaia o ia. Lea la ua saili e Ali silise mafuaaga e moia ai Tanielu, a ua leai lava se mea sese ma se mea leaga na faia e Tanielu. Sa manatu nei tagata ina ia faia se tulafono ma ia pasia mai e le tupu mo le malo uma o Papelonía. Ona faia lea o le tulafono – Ua faasaina ai ona toe tapuai ai se tagata i se isi lava Atua tau lava o le tupua ua tapuai ai Papelonía ma le tupu o Tariu.

O le tatou tusi faitau o lo o faailoa mai ai, o Tanielu e tai foi faatolu i aso, ona tootuli o Ia i ona tulivae ma tatalo ma faafetai i luma o lona Atua, faapei ona masani ai o Ia. E lei mafai ai lava e lenei tulafono ona taofia le masani a le tama o Tanielu e ala i lona ola tatalo i le Atua.

Na maua Tanielu ma ua molia o Ia i luma o le tupu o Tariu ona e uo lelei Tanielu ma le tupu. Ua faanoanoa ma ua le ‘ai ua le moe foi ina ua lafo Tanielu i le lua o leona I le vaveao lava o le aso na sosoo ai, ona faatalise atu ai lea o Tariu ma Alii Sili i le lua o leona. Ua oo i le lua ona alaga atu ai lea o ia ma le leo faama’ima’i ia Tanielu. “Tanielu e, le Auauna a le Atua soifua, ua mafai ea e lou Atua o le ua e auauna iai e le aunoa, ona laveai mai ia te oe mai leona feai?”. Ua tei le tupu i le tali mai o Tanielu... *Aua ua auina ifo e le Atua lana agelu e pupuni i gutu o leona....* Lea ua tali mai le Atua i le tatalo a Tanielu e tusa ma le tatou mataupu o lenei aso Sa. O le mafuta o Tanielu i le Atua i le tatalo, lea ua faasaoina ai lona ola mai leona feai.

Uiga o Upu:

1. Faatafea - nofonofu solo, feaveai solo, maumau solo, ave faatagata o taua
2. Molia - fa’asala
3. Pasia - aloaia, faamaufaailoga, mausali
4. Fa’ataalise - faanatinati, faatopetope
5. Fa’ama’ima’i - leo malū
6. Mafuta - nonofo faatasi i aso uma.

GALUEGA FAATINO:

Faatumu avanoa i upu sa’o o lo o i lalo?

(Atua, tusi, faamalama, fale, Ierusalemá, faafetai, tatalo, tootuli, Tanielu.)

Ua iloa e 1_____ ua tusia le 2_____. Ona alu atu ai lea o ia i lona 3_____, ua avanoa 4_____ o lona potu e faasaga i 5_____, ua tai foi faatolu i aso ona 6_____ o ia i ona tulivae ma 7_____ ma faafetai i luma o lona 8_____ faapei ona masani ai.

TALI : 1- Tanielu, 2 – tusi, 3 – fale, 4 – faamalama, 5 – Ierusalemá, 6 – tootuli, 7 – tatalo, 8 – Atua.

PESE: 359 (Pese ma Viiga)

A'OA'OGA:

1. Toaga e mafuta i le Atua ile tatalo
2. E laveaiina i tatou e le Atua



UA TATALO TANIELU

ASO SA : 14 Iulai 2019

MATAUPU: UA VIVII LE TAUASO

SINI: Ia aoaoina le fanau ia malamalama lelei. Ua vivii le tauaso ia Iesu ina ua faapupulaina ona mata ma mulimuli atu loaia te Ia.

TUSI FAITAU: Luka 18 : 35 - 43

FESOASOANI MO FAIAOGA:

Tou te iloaina tamaiti – O le a lea mea o le tauaso? Ioe o le tauaso o le tagata e matua leiloa lava o se mea e ala i le vaai. Moeiini uma tatou,,e faapena le tagata tauaso. E leai lava se isi o tatou e lei vaai i se tagata tauaso.,A ea?

Faimai le tala sa faitauina – Ina ua latalata atu Iesu i Ieriko, sa nofo le tasi tagata tauaso i le auala e aisi pe faatoga solo ai i tagata feoai i tupe ma meaai. Ua faalogo le tagata tauaso o pisapisao tagata savavali i le auala, ona fesili lea po o le a lea mea e pisapisao mai ai tagata. Ao le taimi lea ua savali atu Iesu i le ala. Ua faalogo le tauaso o Iesu le Nasareta ua savali ane, e lei toe faatali le tauaso, a ua alaga ma le leo tele ia Iesu. *Iesu e le alo o Tavita ia e alofa mai ia te au le tagata tauaso.* Faimai le tala e lei uma atu le alaga lea a le tauaso ae vavao atu e tagata ia e mulimuli atu ia Iesu. Ae ua atili ai ona alaga le tauaso. *Iesu e le alo o Tavita ia e alofa mai ia te au.* Ona tu loa lea o Iesu ma fetalai atu ina ia taitaiina mai o ia ia te ia ma fesili atu loa Iesu i lenei tagata tauaso. *Se a le mea e te manao iai ou te faia mo oe?* Ona tali ane lea o le tagata tauaso – *Le Alii e ou te fia pupula...* E lei talitua limaina e Iesu le manao o le tagata tauaso, ona ia faamalolo lea i le tagata tauaso. Ona ia faapea atu lea ia te ia – *Ina pupula ia ou mata o lou faatuatua ua e malolo ai.* Ona pupula ai lea o mata o le tauaso ma vivii atu ai o ia i le Atua.

Uiga o Upu:

1. Faatoga: aisi, manao i se mea.
2. Alaga: fonō, valaau
3. Faalologo: aua le toe pisa

GALUEGA FAATINO;

Faatino le tala – O Iesu, o le tauaso ma le motu o tagata.

PESE:

Le alofa o le Atua e ofoofogia x 3

Le alofa silisili lea mo a'u

God's love it's so wonderful x 3
Oh what a wonderful love

E maualuga ou te le a'eina
E maualalo ou te le moluina
E lautele ou te le opoina
LE alofa silisili lea mo a'u

So high i can't get over it
So low i can't get under it
So wide i can't get round it
Oh what a wonderful love

A'OA'OGA:

1. Ia tatou alolofa i tagata mamai
2. Ia tatou maua i le loto fesoasoani
3. Ia tatou toaaga e tatalo ia Iesu, e fesoasoani mai.

ASO SA: 21 Iulai 2019

MATAUPU: O LE VINE

SINI: Ia aoaoina le vasega ia malamalama lelei i le uiga o le mataupu – O le vine

TUSI FAITAU: Ioane 15:1 – 7

FESOASOANI MO FAIAOGA:

O lea ua tautala lenei mataupu ia Iesu. Ua faatusaina Iesu i le vine. O laau uma lava o lo o tutupu i luga o le fogaeleele e tofu uma lava laau ma ona lala. E ola lausiusi lala ma fua mai pe afai e pipii i le laau, ae o le taimi lava e vavae ese ai le lala, o le taimi foi lena e mate (pe) ai lena lala. Aua foi e leai se ola i le lala sei vagana ua pipii i le laau. Ua faatusaina la tagata Kerisiano e aofia ai ma tatou tamaiti o le Aoga Aso Sa i lala o le vine.

Ua faapena le tulaga o Iesu ma tagata Kerisiano. I le tusi sa fatauina, o lo o tautala ai Iesu o Ia o le vine, ao tatou o tagata Kerisiano o lala ia o le vine. O lona uiga – o tagata Kerisiano uma e ola

fiafia manuia ma lelei, pe afai e pipii ma tumau ia Iesu le vine. Ae o le taimi lava e alu ese ai le tagata Kerisiano ma Iesu, o le taimi foi lena e mate ai le ola faale-agaga.

Uiga o Upu:

1. Vine : o le igoa o le laau sa taatele i Iutaia i ia ona po
2. Ola lausiusi: manaia le lautetele o ona lau, toe tele ona fua e fua mai
3. Vavae ese: tipi ese, aveese mai i se mea o lo o iai
4. Mate: pe, le ola, mago

GALUEGA FAATINO: Taliga Fesili

1. O ai o lo o faatusa ia i le vine? (Iesu)
2. O ai o lo o faatusa iai lala o le vine? (O tagata Kerisiano)
3. O le a le mea e maua e le tagata Kerisiano e pipii pea ia Iesu? (E ola fiafia manuia ma lelei)

PESE : O Iesu o le vine moni.

AOAOGA:

1. Ia tatou pipii pea ia Iesu i aso uma
2. Aua nei mate le ola faaleagaga.
3. Iesu le vine moni.



Download from
Dreamstime.com

This watermarked comp image is for previewing purposes only.



ID 26627531

© Chiyacat | Dreamstime.com

O LE VINE

ASO SA: 28 Iulai 2018

MATAUPU: POTOPOTO LE FANAU A IOPU

SINI: Ia aoao le vasega ia malamalama lelei i le fanau a Iopu, e pei ona faailoa mai i le Tusi Faitau sa faitauina.

TUSI FAITAU: Iopu 1:6 – 12

FESASOANI MO FAIAOGA:

Ua masani lava ona tatou faalogo i le tala ia Iopu. O Iopu o se tagata e sao lana amio, e amiotonu ma le matau i le Atua. O le ala foi lena o le manuia ma le tele o lona tamaoaiga, e pei o ana lafumanu o mamoe o kamela o povi ma asini, faatasi ai ma ana auauna.

O Iopu e toasefulu lana fanau, e toafitu tama ma teine e toatolu. O lenei fanau e ese ma le fealofani, e galulue faatasi ma faifaimea faatasi. I le vaega o le tusi sa faitauina Faimai ua oo i le tasi aso ona omai ai lea o atalii o le Atua e tutu mai i luma o le Alii, ae sau ai ma Satani. O ai Satani tamaiti? Ioe o satani o le tiapolo o le fili e taufaaosooso mai iai tatou tatou te o e fai le mea sese a?? Ona fesili ai lea o le Alii ia Satani – *O fea e te sau ai?* O le tali a Satani – *Ua ou sau na ou fealuai ma fesavalivalia'i i le lalolagi.* Ua toe fesili le Alii ia Satani – *Poo ua e mafaufau ea i la'u auauna o Iopu, aua o le tagata ua sao lana amio..?* Na iloa lelei e Satani le mata'u o Iopu ma talitonu i le Atua, o ona manuia ma lona tamaoaiga o mea ia na foai iai e le Atua. Ona fesili lea o Iopu i le Atua – *Ua mata'u fua ea Iopu i le Atua ? ua le siosiomia ea o Ia i le aupa o lona fale, atoa ma ana mea uma i itu uma, ua e faamanuia i galuega a ona lima o ona fanua ma ana lafumanu. O lenei ina aapa atu ia ma e tago atu i ana mea uma pe na te le faifai ai ea ia te oe i ou lava luma?* Ona tali atu ai lea o le Atua ia Iopu. *Faauta, ua i ou lava lima o ana mea uma, tau lava o lona ola aua e te faaoo iai lou lima.* Ona alu ese ai lea o Satani ai luma o le Atua.

Manatua foi tamaiti i le taimi ao fai talanoaga a le Atua ma Satani, ao lea e potopoto ai le fanau a Iopu, o atalii o le Atua o e na tutu mai i luma o le Alii. Ua taunuu ai foi ma le tatou mataupu o lenei Aso Sa. O le aoaoga mo tatou le fanau, ia tatou mataala i le faaosoosoga a le fili poo le tiapolo. E omai fatasi lava le Agaga o le Atua ma le tiapolo. O le tiapolo lea e masani ona faiatu ia oe e aua le faia lau meaaoga, e te alu e matamata i le tv, e te alu e tafao ae tuu le feau na fai atu ai ou matua. Ia tautuana ma tatou le fanau.

GALUEGA FAATINO: Taliga Fesili

1. O a ni mea tatou te iloa ai le tamaoaiga o le toeaina lenei o Iopu?
2. O ai lea na faamatala iai e le Atua manuia ma le tamaoaiga o Iopu?

3. O ai Satani?
4. O ai na faatatau tonu i ai le fanau a Iopu na potopoto?


TALI:

1. Tele ana lafumanu ma ana auauna
2. O Satani
3. O le fili poo le tiapolo e taufaosooso mai i ai tatou
4. O atalii o le Atua o e na tutu mai i luma o le Atua.

PESE: 225 (Pese ma Viiga)

A'OA'OGA:

1. Ia mausali ma tumau pea lo tatou talitonu ma le faatuatua i le Atua
2. Ia tatou mataala i faaosoosoga a le tiapolo
3. Aua le tosina gofie i faiga a le fili.



UA POTOPOTO IOPU MA LANA FANAU

MANATU TAIALA O AOKUSO: TAMA O LE TALA LELEI.

O Tama o le Tala Lelei o lo o faamatala mo lenei masina, oi latou ia sa o latou taumafai malosi e faamatala ma faailoa mai i ai tatou le Tala Lelei i le malo o le Atua. O lona alofa ma lona agalelei, aemaise o ala e tatau ona tatou savalia ina ia faamanuiaina i tatou. O Tama ua ta'ua o ulu o aiga, e ao i ai tatou le fanau ona tatou faalogo ma usitai i o tatou Tama. O o tatou Tama o lo o tausia i tatou ina ia tatou ola manuia ma soifua maloloina.

ASO SA : 4 Aokuso 2019

MATAUPU : O IOANE LE MOLIMAU

SINI : Ia aoaoina le vasega ia malamalama – o Ioane le molimau i le malamalama o Iesu ina ia faatuatua i ai o tagata uma lava ia te ia.

TUSI FAITAU : Ioane 16: 6 - 8

FESOASOANI MO FAIAOGA:

I le faaulutalaina o le mataupu muamua o le evagelia a Ioane. O loo faapea mai “Ua liutino tagata le upu”. O lona uiga sa i le amataga le Upu sa i le Atua le upu o le Atua foi le upu. O le Atua o le ola, ao le ola o le malamalama lea o tagata uma lava e pei ona molimau ai Ioane. O Ioane le molimau – o le tagata na auina mai e le Atua ina ia molimau i le malamalama (Iesu) ina ia faatuatua i ai tagata uma lava ia te ia. E le o o le malamalama o ia, a ua sau o ia ina ia molimau i lea lava malamalama. O le isi vaega taua o mea na molimau ai Ioane o lona vaai tino lea i le afio ifo o le Agaga Paia, na ia faalogo foi ma le manino i le siufofoga mai le lagi i le taimi na papatisoina ai Iesu. O lo o faailoa mai i le fuaiupu 32 – 34 o le mataupu muamua.

Faimai Ioane “Na ou iloa le Agaga ua afio ifo mai le lagi peiseai se lupe ua nofo i ona luga, ou te lei iloa o ia, peitai o ia na auina mai a’u e papatiso i le vai, ao ia na te papatiso i le afi ma le agaga” O le papatisoga na faia e Ioane – ua tapena ma sauni ai lotoo tagata ia salamo mai a latou agasala. O le ala lea e ta’ua ai Ioane o le teuteu ala. O ia ua pei e sau e teuteu le ala e afio mai ai le malamalama o Iesu.

E faapena tatou le fanau – e mafai foi ona avea i tatou ma molimau e pei o Ioane. E tatou te molimau ai i le tala lelei e ala i lo tatou ola ususitai ma faia mea e finagalo ai le Atua, ae leo mea a le tiapolo. O tatou o tagata ua omai e teuteu le ala ina ia susulu pea le malamalama o Keriso i tagata o e o lo o i le pogisa. Ia manatua tamaiti ua faatusaina Iesu o le malamalama – ona O Iesu e aumai mea lelei ma le ola i ai tatou.

GALUEGA FAATINO: \Saili mai upu nei i totonu o le paso?


Iesu, Ioane, molimau, papatiso, lupe, malamalama.

F	P	M	O	L	I	M	A	U	E
M	A	L	A	M	A	L	A	M	A
A	P	R	S	P	P	L	O	S	G
A	A	T	I	E	S	U	A	T	I
M	T	F	M	E	T	P	N	K	O
O	I	S	H	L	N	E	T	O	A
P	S	E	K	A	F	L	M	N	N
N	O	T	S	N	M	T	L	F	E

PESE : 145 (Pese ma Viiga)

AOAOGA:

1. Ia avea i tatou ma molimau o le tala lelei.
2. Ola i le malamalama o Keriso



IOANE LE MOLIMAU

ASO SA : 11 Aokuso 2019

MATAUPU : O LE TAMA FAATUATUA

SINI : Ia aoao le vasega ia malamalama i le ola auauna ma le talitonu i le Atua, e ala mai ai le tele o faamanuiaga.

TUSI FAITAU : Kenese 22:1 - 13

FESOASOANI MO FAIAOGA:

O le fanau mai o le tama o Isaako, o se mea sa folafolaina e agelu ia sa asiasi ia Aperaaamo ma Sara. Ua leva ona nonofo faatali lenei aiga i se aso e oo mai ai lea faamanuiaga i lo la aiga.

I le tusi faitau ua faatatau mo tamaiti i le vaega tonu o fai iai le mataupu. Ua taoto le amataga i le valaau tofotofo a le Atua ia Aperaaamo, ua taoto foi le vaioa o taulelea e faatali atu i le as ona tolu o le savaliga, ae o le a tuu sa’o loa le faamatalaga o aumai ai le mataupu. O lea ua faailoa mai e le Atua ona mana’o i le atalii faapelepele o Aperaaamo ina ia ave e faitaulaga atu ai i le Atua. E leai se upu e tasi na tali atu ai Aperaaamo i le Atua, a ua faia mea uma ma lona usitai. E ui lava ina ua ia lagona lona alofa i lona atalii e toatasi. Na silafia lelei e le Atua ua nao le toatasi le atalii o lana auauna o Aperaaamo, peitai sa ia tofotofo atili le malosi o le fatuatua o lana auauna o Aperaaamo.

Ina ua faataunuu e Aperaaamo le finagalo o le Atua ma le talitonu atoatoa, ona ia aumaia lea o le tamai mamoe e sui ai Isaako. Sa tautino mai foi e le agelu ia Aperaaamo i lea lava taimi – *Ua silafia e le Atua lou mata’u ma lou faatuatua ia te ia, aua ua e le taofia lou atalii e toatasi lava, ae ua e aumai ia a’u.* O le maea ai o le osiga o le taulaga i le mamoe na foai mai e le Atua, sa faa mautinoa ifo ai e le agelu ia Aperaaamo e faapea - *Ua tauto le Alii ia te ia lava, ona o lea mea ua faia e Aperaaamo ia te ia*” Ua fai ma pine o lona faatuatua ma lona talitonu faamaoni. Ona fetalai lea o le Atua e ala i lana agelu- *O le a ia matua faamanuia ia Aperaaamo, e toatele lana fanau e pei o le oneone o le matafaga ma fetu o le lagi, e manuia i lana fanau nuu uma o le lalolagi.*

O le mavae o ia mea, na toe foi ai loa Aperaaamo ma Isaako ma taulelea i lo latou nuu o Peresepa. O le tatou tala lena tamaiti, vaai la outou i le lelei o le usitai ma faalogo i le Atua, ua maua e Aperaaamo faamanuiaga e tele mo ia ma lona aiga, ma e uma e tutupu mai ia te ia. O le aoaoga foi lena mo tatou le fanau – Ia tatou faalogo ma usitai i o tatou matua.

Uiga o Upu:

1. Taulaga : o se mea e te faia pe ofo atu e faailoa atu ai lou agaga faafetai i le Atua

2. Mamoe : o le manu filemu tele, e manaia lona aano i le ai, aoga foi ona fulufulu e fai ai ie mafanafana mo le tau malulu
3. Tofotofo : saili le moni ma le le moni o se mea ua tupu
4. Fata faitaulaga : O le fata e susunu ai luga taulaga
5. Faaafu : fatufatu lelei ma faataatitia lelei fafie i le tulaga e mumu ma ola lelei ai
6. Polo : o le naifi
7. Nifo : o seu o le mamoe
8. Vavega : o se mea ofoofogia e le masani ona tupu, e seasea foi ona vaai i ai ni tagata.

GALUEGA FAATINO:

- Fai se faatinoga puupuu o le tala. Amata mai ina ua vaoia taulelea ae nao Aperaamo ma Isaako i le mauga o Moria e osi ai le taulaga.

AOAOGA:

1. E saunia e le Atua ala mo lo tatou laveaiina.
2. Faatuatua faamaoni i le Atua e manuia ai.
3. O vavega o le Atua e mo lo tatou ola

PESE : 23 (Pese ma Viiga)



APERAA MO MA ISAAKO

ASO SA : 18 Aokuso 2019

MATAUPU : UA OTI ELI

SINI: Ia aoao le vasega ia malamalama i le mafuaaga o le oti o Eli

TUSI FAITAU : 1 Samuelu 4:12 – 18

FESOASOANI MO FAIAOGA:

O Eli o le ositaulaga lea sa nofo ai le tama o Samuelu e fesoasoani i le galuega faa-ositaulaga. O Eli o se toeaina ua matua ma ua tau faaletonu foi lana vaai. O Eli lea na fetalai ai le Atua ia Samuelu ma tautino – o le a ia faasala i lona aiga e faavavau ona o le pagota ua ia iloa. Ona o ona atalii ua fai mea e fetuuina ai i laua, a ua ia le taofi i ai laua. O le mea lea ua ia tauto ai i le aiga o Eli – e le faamagaloina le pagota a le aiga o Eli i se taulaga po o se isi lava mea e foaiina mai e oo a i le faavavau.

Faimai le tala, ua tau nei au a Isaraelu ma au a Filisitia, ma ua matua fasia au a Isaraelu ua oo i le tolugafulu o afe oi latou oa e savavali ua fasiotia uma. Ua avea foi le atolaau a le Atua ma atalii e toalua o Eli o Hofeni ma Fineaso ua feoti i le taua. Ua tamo'e mai le tagata ole sa Peniamina e ta'u mai le mea ua tupu i le au tau a Isarelu. Faimai le tagata lea ia Eli- *O au nei le tagata na ou sau mai le taua, ua ou sola mai le taua i le aso nei. Ua sosola Isaraelu i luma o Filisitia ma ua tele le fasi o le nuu, ua mailiu foi ou ataii e toalua o Hofeni ma Fineaso...ua avea foi le atolaau a le Atua.* Ona pau ai lea i tua o Eli nai tua mai luga o le nofoa i tafatafa o le faitotoa, ua gau lona ua ma ua oti ai, aua ua toeaina lava o ia.

Ioe tamaiti, ua oti Eli ona ua matua lona soifua, ae iai le isi mafuaaga ua oti ai Eli. O ai se tamaitiiti na te iloa. O lana fanau Hofeni ma Fineaso o ni tama sa le usitai i le Atua. O le ala lena ua feoti ai. O se aoaoga foi lea mo tatou le fanau, aua tatou te faalogogata ona e tutupu ai fafitauli i totonu o tatou aiga.

Uiga o Upu:

1. Gatete : popole, le mautonu
2. Ta'alili: leo o tagata
3. Faataalise : faanatinati
4. Ivagafulu ma le valu : 98
5. Tomatuina: tau leiloa se mea, puaoa le vaai
6. Fetuuina : ta'uleagaina, ta'uvalea

GALUEGA FAATINO:

Saili mai upu nei i totonu o le paso
(Eli, Atolaau, Hofeni, Fineaso, momoe, sailo)

E	K	L	M	N	A	S	F	S	U
S	A	I	L	O	A	L	I	N	M
K	T	L	F	S	R	H	N	S	T
R	O	I	S	T	H	O	E	N	I
N	L	E	L	I	K	M	A	L	T
I	A	K	R	H	S	I	S	N	M
N	A	R	T	M	O	M	O	E	T
A	U	M	N	K	L	O	A	S	L

PESE : 122 (Pese ma Viiga)

A'OA'OGA:

1. Ia tatou aloalo ese mai le leaga
2. Aua nei pei i tatou o le fanau a Eli
3. IA tatou mafuta i le Atua i le tatalo.



UA PAU ELI MA OTI AI

ASO SA : 25 Aokuso 2019

MATAUPU : TAMA LOTO FAAMAGALO

SINI: Ia aoaoina le vasega ia malamalama e alofa le Atua i le tagata agasala ae salamo faamaoni.

TUSI FAITAU : Luka 15 : 20 – 24

FESOASOANI MO FAIAOGA:

O le faataoto leni i le uii faamaumauoa, o se tala o lo o aumai ai se aoaoga i le alofa faa-tama o le Atua. O le salamo o le faanoanoa loloto lea aua ua agasala, o le aoi i le Atua ia faamagaloina agasala ma ia foai le malosi fou e auauna ai ia te ia ma le faamaoni. O le toe foi o le atalii ina ua lagona le salamo, e lei faatuai ae na faataalise ona fai. O lo o faatali le tama ma le alofa poo ola pea lona atalii po o ua oti. Peitai o lea ua toe foi le atalii. Ina ua iloa mamao e le Tama si ona atalii, ona mutimutivale ai lea o lona alofa.

O le alofa ua tupu ae i le tama mo le atali ua auleaga ma vaivai i l e ola tuinanau. Ua ia momoe atu ma fusi lona atalii ma sogi atu ia te ia. Ua faiatu le atalii i lona tama – “Ia aua nei toe ta’ua o ia o lona atalii, a ia avea o se tasi o ana auauna”. E lei toe tali le tama ae ua faiatu i ana auauna, ina ia aumai le ofu tatapuvae e aupito lelei ma faaofu ai ia te ia. O le faailoga lea o le loto faamagalo o le Tama i lona atalii aua ua toe foi mai lona atalii o lo o ola pea.

Na ia faatonu foi i ana auauna ina ia fasi se tamai povi peti e fai le latou meaai, latou te aai ma fiafia aua o lona atali na oti a ua toe ola mai, na leiloa foi o ia a ua toe maua. Ua aoao mai leni tala i ai tatou le fanau – I le alofa faamagalo o le Atua e pei ona faalia i le toe taliaina e le tama o lona atalii. E mafua ona talia e le Tama lona atalii, ona o lona loto sa ia faamagalo ai lona atalii ma lana mea sa fai. E le fuaina le alofa faamagalo o le Atua i so tatou leaga ua iai. Ae manaomia lo tatou faatalise ma foi atu i le Atua e ala i le salamo. Ua tatou iloa i le tala, a mulimuli atu le tautinoga a le atalii, ae ina ua iloa atu e le Tama ua foi atu le atali. E le gata ua tu i luga, a ua tamoe ma fusi ma sogi atu ia te ia. O le faailoga o le faamaoni o le alofa faamagalo o le Atua.

Uiga o Upu:

1. Fusi - opoopo mai
2. Sogi - kisi atu
3. Ofu tatapuvae - ofu talaloa, ofu totoso

GALUEGA FAATINO: Faatino le tala - Ia manino le taua o le vaega a le Tama i le tala.

PESE : 71 (Pese ma Viiga)

A'OA'OGA:

1. Foi i le Atua e ala i le salamo
2. Faaaoga lou ola mo le Atua
3. E faamaoni le alofa o matua i fanau.



TAMA UA FAAMAGALO LONA ATALII.

MANATU TAIALA SETEMA & OKETOPA : FANAU O LE TALA LELEI

O le manatu autu lea o lenei masina, o le masina lenei e faamanatuina ai le taunuu mai o le Tala lelei i Samoa, ma ua manatu ai. O fanau uma i tatou o le tala lelei ia Iesu Keriso. O le faavae lava lea e tatau ai ona lima taitaiina ai fanau a lo tatou Ekalesia. Ina ia iloa ma taitaina i latou i le Tala Lelei ia Iesu Keriso.

ASO SA: 1 Setema 2019

MATAUPU: MESIA O LE TALA LELEI

SINI: Ia a’oa’o le vasega ina ia iloa le uiga o le upu Mesia, aemaise o le taua o le oo mai o le Tala Lelei i Samoa.

TUSI FAITAU: Mika 5: 1 – 9

FESOASOANI MO FAIAOGA:

Ia faatomua le mataupu i le faamanatu i tamaiti, o le aso lenei o loo faamanatuina ai e le Ekalesia Aoa, le taunuu mai o le Tala Lelei i Samoa. O le tausaga foi lenei ua atoa iai le 189 tausaga talu ona suluia laufanua o Samoa i le malamalama o le Tala Lelei o le Mesia na valoia e perofeta, e pei foi ona valoia e le perofeta o Mika.

O le uiga o le upu Mesia, o le ua faauuina poo le ua filifilia. E ui lava i le tele o agasala a le nu’u, e le finagalo le Atua e tumau ai pea ona tagata i le amioleaga ma le agasala, ae ia lagona e i latou le salamo ma toe foi i le Atua, le Atua sa osi feagaiga ma o latou augatama. O le faamoemoe lea o le feau a le Perofeta o Mika, e tupu le faamoemoe i le taulogologo, o le a afio mai lo latou Mesia, o ia o le faipule ia Isaraelu. O ia o le faaola.

O Peteleema Eferate, o se aai itiiti i totonu o Iuta, o faiga ia faale-Atua, e na te fa’aaogaina mea faatauva’a e faatupu ai se vavega ofoofogia. O le Mesia o le a afio mai, e tupu a’e i se aai itiiti ma le faatauva’a, ae o Ia lava ua filifilia, ua faauuina e le Atua e fai ma taitai, e fai ma o latou tupu, o le tupu na te aumaia le filemu, e le toe sii ai taua o le isi ma le isi malo. O Iesu Keriso o Ia lava o le Mesia na valoia, e ui ina teena e le lalolagi aemaise o Isaraelu sa latou faatalitali i so latou tupu e sau ma le pelu e tietie mai le solofanua. Peitai, e ese lava manatu o tagata ese le finagalo o le Atua. A o le Mesia lea na molimoli mai e Ioane Viliamu ma Misionare Lonetona, lea ua faatalaleiina atu ai ma i tatou. O le ua faauuina ma ua filifilia e le Atua, e na te faaolaina le lalolagi ia te Ia. O le faaolataga foi lea tatou te saofaga ai i le ola faavavau ua uma ona saunia e le Atua mo i latou e talitonu ma faatuatua ia te Ia. O Iesu Keriso o ia lava o le Mesia o le Tala Lelei.

GALUEGA FAATINO: Taliga Fesili

1. O le a le tausaga na taunuu mai ai le Tala Lelei i Samoa?

Tali: 1830.

2. O ai igoa o le Misionare na ia aumaia le Tala Lelei i Samoa?

Tali: Ioane Viliamu

3. O ai le igoa o le Mesia na valoia?

Tali: O Iesu Keriso

4. O le a le uiga o le upu Mesia?

Tali: O le ua faauuina po o le ua filifilia e le Atua e faaola i le lalolagi.

5. O fea le nuu lea na valoia e Mika o le a tupu a'e ai lea Mesia?

Tali: O Peteleema Efarata i Iuta.

PESE: Ou te fia alu i le aoga Aso Sa
 E pese ma vivii i le Tamā
 Ou te fia alu i le aoga Aso Sa
 E faalogo i le Tala ia Iesu
 A sau Satani e faaosooso mai
 E faamisi le Aoga Aso Sa
 Ou te tulia i fafo, ma ou fai iai
 E pule Iesu ia te a'u.

I want to go to Sunday School
 To sing and praise the Lord
 I want to go to Sunday School
 To hear the stories of Jesus
 If Satan comes down and tell me so
 To skip the Sunday School
 I'll chase him away and tell him so
 I only belong to Jesus.

A'OA'OGA:

1. O Iesu o Ia o le Mesia na valoia.

2. Ia loto maulalo e pei o Iesu.
3. O Iesu Keriso o le Tala Lelei moni.

ASO SA: 8 Setema 2019

MATAUPU: NA MOLIMAU SAULO

SINI: Ia a’oa’oina le vasega ina ia malamalama i le olaga sa ola ai Saulo, ma lona liliuina e fai ma tagata lelei e tala’i le Tala Lelei.

TUSI FAITAU: Galuega 7: 54 – 60; Galuega 8: 1 - 3

FESOASOANI MO FAIAOGA:

O le tala lea sa faitauina, o le loto tiga o taitai o le fono ua taua o le au Saneterini (Sanhedrins). O i latou nei, e pei o ni faamasino o se faamasinoga maualuga. O i latou ia e faia faaiuga o se tagata solitulafono pe tetee i talitonuga o le lotu Iutaia. O le mafuaaga o lo latou loto tiga, ina ua toe faamanatu atu i ai e Setefano augatama o le Feagaiga Tuai ma lo latou faatuatua i le Atua, e pei o Aperamo, Iosefa ma Mose. E tele lava upu o le lauga a Setefano e matua feteena’i ma lo latou talitonuga, aemaise o le lē talitonu i le Mesia ua valoia, ma le toetu mai o Iesu nai le oti ma le tuugamau.

O le molimau a le au suesue o le Tusi Paia, o le tagata muamua leni na oti faamatuoro, o le oti faamatuoro, **o le tagata ua fasiotia ona o lana molimau e uiga ia Iesu Keriso.** O le taimi na fasiotia ai Setefano sa tu tu ai ma le tagata leni e igoa ia Saulo, o ia sa taofia ofu o i latou na faaoo le oti ia Setefano. O lona uiga o Saulo le isi molimau maumaututu i le fasiotia o Setefano. O le taimi lea o le talavou o le soifua o Saulo, ae sa lavea ai i totonu o le fono lea a le au Saneterini. Peitai tamaiti e ui i le masausau o le saua o Saulo i lena taimi, peitai a fa’aaau le faitau i le mataupu e 9 o iina na taia ai e le Atua Saulo i lona pupula malos, ma liliuina ai o ia ina ua fesagai ma le silisili ese o le Atua.

O le a’oa’oga taua o leni tala, e le tumau ai pea se tasi i le leaga, a o le faamoemoe foi lea o le Atua mo i tatou le fanau. E le finagalo le Atua e leaga a tatou amio, o le finagalo tutasi o le Atua, ia tatou amio mama ma amio lelei, ma ia i’u atu i tatou uma i lona malo e faavavau. O Saulo o le tagata saua, o le tagata sa sili ona tetee i le Tala Lelei e uiga ia Iesu Keriso. Peitai, ina ua maua o Ia e Iesu, o se molimau faamoemoeina ma ua fai ma fa’aa’oa’o mo so o se Kerisiano, i lona soifua aoga ma le tala’iina o le Tala Lelei a Iesu. Na suia lona igoa mai ia Saulo ia Paulo, o

Paulo o le tagata fou, na lafoai e Paulo lona igoa o Saulo, o lona uiga ua lē o toe ola Saulo ao Keriso ua ola i totonu ia Paulo. O le isi a’oa’oga o lenei tala, o le tumau o le faatuatua o Setefano i le Atua, e ui lava ina tauai i ma’a. ma fasiotia ae tatalo lava,. Fai mai lana tatalo, “Le Alii e Iesu, ia e talia mai lo’u nei agaga. Ua iloa e Setefano, e ui ina oti a’o lona agaga e soifua e faavavau ma lona Alii o Iesu. E lei avea foi le agaleaga o tagata ma ala e fia tauimasui ai. Ae na tatalo i le Atua e faamagalo, fai mai ana upu aua e te tuuina atu lenei agasala ia te i latou. E pei o le fetalaiga a Iesu, Ia e faamagalo atu ia te i latou auā ua latou le iloa le mea ua latou faia.


GALUEGA FAATINO:

Faatino le tala i le tauaiga o Setefano i maa, ma le molimau ai a Saulo, ae manaia foi ae fa’auau atu i le liua o Saulo e fai ma Paulo.

PESE: O le Atua e tele, malosi ma matautia
E lei se mea e le mafai ona ia faia.

A’OA’OGA:

1. E le fiafia le Atua i le amioleaga.
2. Ia tatou ola i le loto maulalo ma faamagalo.
3. E alofa Iesu i le tamaitiiti faatuatua ia te Ia.



SETEFANO UA FETOGI I MA'A

ASO SA: 15 Setema 2019

MATAUPU: UA FANAU IKAPOTI

SINI: Ia a’oa’o le vasega ina ia malamalama i le uiga o le igoa Ikapoti.

TUSI FAITAU: 1 Samuelu 4: 19 – 22

FESOASOANI MO FAIAOGA:

O le uiga o le igoa Ikapoti, **“Ua aveeseina le mamalu o le Atua mai ia Isaraelu.** O Ikapoti o le tama a le toalua o le atalii o Eli e igoa ia Fineaso. O le tala fai mai, na toasa le Atua i atalii nei e toalua o Eli, o Hofeni ma Fineaso, o le masani a ositaulaga a Isaraelu, e iai le auauna a le ositaulaga e alu atu ma le tui mata tolu e tui mai ai tufaaga poo mea o loo susunuina mo se taulaga i totonu o se tanoa poo se ulo poo se pani, o mea lava e pipii mai le tui, o mea na e ave i le faitaulaga. Peitai, o mea sa fai e tama nei, sa la faatonu le tagata e ona le taulaga ina ia vavae ese se tufaaga a le faitaulaga a’o mata e aua le faavelaina. Ae o loo malamalama tagata, e tunu muamua pe susunu muamua le ga’o, ona ave ai lea o se tufaaga ma le faitaulaga.

Ae fai mai upu a le fanau a Eli e leai, a le usitai o le a la faoa mea o le taulaga. O le agasala lea a tama na mafua ai ona toasa le Atua, ma ua avea foi lea ma mea ua aveese mai ai le tofi o le faitaulaga mai ia Eli ma lona aiga. Na fasia e Filisitia ma ave le atolaau o le feagaiga ma le Atua. Na logo atu le tala ia Eli ua fasiotia ona atalii o Hofeni ma Fineaso, ua oti ai lava Eli i le taimi lava lea. Ua faapea foi i le toalua o Fineaso, ua oo i lona masina o fanau ai, fai mai ua logo tala loa ua fasiotia lona toalua, ona fanau ai lea o ia, ua tigaina lava le fafine, peitai o fafine sa iai ua faamalosi atu ia te ia, ina ia loto tele ua fanau lana tama tane. Ona faaigoa ai lea e le fafine o lana tama tane na fanau, o Ikapoti o lona uiga. Ua aveeseina le mamalu o le Atua mai ia Isaraelu. E iai le taua i o tatou igoa, o le tu foi lea ma le aga faa-Eperu, e ta’u mai e lou igoa, le ituaiga tagata o loo e iai.

Ou te le iloa poo fea ua taunuu iai le olaga o si nei tamaitiiti, o Ikapoti pe a tuu atu i le uiga o lona igoa. Ua fai e matua ae ua aafia ai le ola o nai fanau. Ua aveeseina le mamalu o le Atua, o le mea lea e oo iai le tagata e toasa i ai le Atua, e oo ina aveeseina le tele o faamanuiaga e tatau ona ia maua.

GALUEGA FAATINO: Saili mai upu nei i totonu o le paso

1. ATUA, 2. ELI, 3. IKAPOTI, 4. HOFENI, 5. FINEASO, 6. OSITaulaga

T	A	N	F	O	S	N	E	A	T
P	E	M	P	S	T	M	E	A	K
H	U	O	F	I	N	E	A	S	O
O	X	P	M	T	V	L	S	K	S
F	H	S	L	A	H	I	A	L	N
E	S	T	K	U	K	U	M	T	P
N	S	U	N	L	T	S	O	K	K
I	F	I	K	A	P	O	T	I	L
S	N	V	A	G	F	F	I	L	L
V	L	H	L	A	P	N	S	M	M

PESE: Pese 11 (Pese & Viiga)

A’OA’OGA:

1. E faamamalu i tatou e le Atua
2. E le fiafia le Atua i le agasala.
3. E iai le taua o o tatou igoa.

ASO SA: 22 Setema 2019

MATAUPU: UA TOFIA SOO O IESU

SINI: Ia a’oa’oina le vasega ina ia malamalama, o le tofiaina o so’o o Iesu, o le manaomia lava lea o i tatou e fesoasoani mo le galuega tala’i a Iesu i le lalolagi.

TUSI FAITAU: Mareko 3: 13 – 19

FESOASOANI MO FAIAOGA:

Tamaiti, o le uiga o le upu so’o, o le tagata ua matua mulimuli ma le faamaoni ia Iesu ma faia lona finagalo. O le tofia ai e Iesu ma fia lona finagalo. O le tofia ai e Iesu e ona soo, ina ia fesoasoani ia te Ia i lana galulega faaola. O le valaauina ina ia faasoa atu ai ia te i latou lona mana, ina ia mafai ai ona latou faia vavega, faamalolo ma’i, faatutu i e ua oti.

E toa 12 so’o o Iesu, o Simona Peteru, Iakopo ma Ioane o le fanau lea a Sepetaio, o Aneterea, Filipino, Pataolomaio, Mataio, Toma, Iakopo le atalii o Alefaio, Tataio, Simona le Kanana, ma Iuta le Sekera. Aisea na mafua ai ona tofia so’o o Iesu? Ina ua amata le galuega faaola a Iesu sa ia manaomia lava nisi e fesoasoani i lana galuega. O lea na ia filifilia ai loa le toa 12 o ona so’o, ina ia latou mafuta faatasi faaleuso pe faaleuo foi.

Peitai, o Iesu foi o ia o le faiaoga, ua avea o ia ma faiaoga i ona so’o, e a’oa’o atu i latou i le finagalo o lona Tama oi le lagi, ma le faia o le galuega Faaola i tagata. Na talia e nei tama e toa 12 le valaau atu a Iesu ina ia avea i latou ma ona so’o. Na tuua lava o latou valaauina ma galuega sa fiafia i ai, ae mulimuli atu ia Iesu. Fai mai Iesu, “mulimuli mai ia te a’u, ou te faia outou ma faifaiva i tagata. E saili agaga mo Iesu ma lona malo. Tamaiti, o i tatou foi o uo poo soo o Iesu. E mamao Iesu tatou te mulimuli i ona ala ma ana a’oa’oga o lo’o ta’u mai i le Tusi Paia, ina ia manuia ai o tatou olaga. Ia tatou faataitai i le soifuaga o Iesu, o le alofa, ma le agalelei i so o se tasi, faalogo ma usita’i i ou matua, o le faifeau, ma ou faiaoga. Ia fai le amio lelei e fiafia mai ai Iesu ia i tatou.

GALUEGA FAATINO:

Lisi mai le au soo e toa 12 o Iesu, faasolo mai lava i le faasologa o lo’o i ai i le Tusi Faitau.

1. Simona Peteru
2. Iakopo
3. Ioane
4. Aneterea
5. Filipino
6. Patolomaio
7. Mataio
8. Toma
9. Iakopo le atalii o Alefaio
10. Tataio
11. Simona le Kanana
12. Iuta le Sekera

PESE: Sefululua o le au so’o
 Na valaauina e Keriso
 Simona Peteru, Aneterea
 Iakopo lona uso o Ioane
 Filipino Toma Mataio, Iakopo le atalii o Alefaio
 Tataio, Simona, Iuta ma Patolomaio

Tali: Na ia valaauina tatou x 2
O i tatou o lona au so'o
Tatou te faia lona finagalo.

A'OA'OGA:

1. Ia tatou mulimuli ma le faamaoni ia Iesu
2. O i tatou o le au so'o o Iesu.
3. O Iesu o le uo a tamaiti.



IESU MA ONA SO'O

ASO SA: 29 Setema 2019

MATAUPU: NASERI A LE ATUA

SINI: Ia a’oa’oina le vasega ina ia malamalama i le uiga o le upu Naseri.

TUSI FAITAU: Faamasino 13: 1 – 5

FESOASOANI MO FAIAOGA:

O le naseri, o le tagata ua vavaeeseina poo ua faapaiaina mo le Alii. I le tusi a Numera o lona mataupu e 6, o iina o loo fetalai ai le Alii ia Mose, i tulafono ma mea e ao ona faia e soo se tagata ua filifili e fai o ia ma naseri.

E 40 tausaga o faapologaina Isaraelu e le nuu o Filisitia, ina ua latou toe amioleaga ma o ese soo mai le Atua. O le taimi lea na faailoa mai ai le agelu a le Atua i le toalua o le tagata e igoa ia Manoa, o Manoa o le tagata e mai le nuu o Soraa, o le ituaiga o Tanu. Fai mai le fetalaiga a le Atua e tauala mai i lana agelu. “Faauta mai o oe e pa, e te lei fanau o le a e to ma e fanau se tama tane, o le toe foi faalua mai o le fetalaiga a le Atua ua faamautuina ai e Manoa, e moni lava si ona toalua. O lea na ia osi ai le taulaga i le Atua. Na fanau mai le tama o Samasoni, o ia lava o le naseri mai le Atua ina ia faaolaina lona nuu mai faiga le alofa a Filisitia. O se tama malos, ma e faatuatua tele i lona Atua.

O Samasoni o le naseri i le Feagaiga Tuai, peitai i le Feagaiga Fou na maua ai foi e Maria le perofetaga lava lea e tasi. O le a to oe ma e fanaua se tama tane, e te faaigoa ia te ia o Iesu, o lona uiga o le Faaola. O Iesu Keriso o le naseri o le Feagaiga Fou, o lona soifua, ua faaolaina ai le lalolagi uma. Tamaiti, ia avea i tatou ma naseri, e fiafia mai i ai le Atua, e ala i lo tatou faia o amio lelei ma le amio mama i aso uma.

GALUEGA FAATINO: Tali mai fesili.

1. O ai le igoa o le tama o Samasoni?

Tali: O Manoa

2. O fea le nuu o Manoa?

Tali: O Soraa, o le ituaiga o Tanu

3. O le a le uiga o le upu naseri?

Tali: O le ua vavaeeseina poo ua faapaiaina mo le Atua.

4. O ai le naseri o le Feagaiga Tuai?

Tali: O Samasoni

5. O ai le naseri o le Feagaiga Fou?

Tali: O Iesu Keriso.

PESE:

O a'u lenei o Samasoni
 Villa la kamupani
 Ou te pese ma olioli
 Villa la kamupani
 O le naseri a le Atua
 O le tatalo ma faatuatua
 E alofa mai ai le Atua
 Ia i taua, ia i taua

A'OA'OGA:

1. O le amio lelei e fiafia ai le Atua
2. Ia fai i tatou ma naseri mo le Atua
3. O Iesu o le naseri a le Atua.



SAMASONI LE NASERI A LE ATUA

ASO SA: 27 Oketopa 2018

MATAUPU: O FANAU O LE TOFI MAI LE ALII

SINI: Ia a’oa’o le vasega ina ia iloa ma malamalama i le telē o le taua ma le aoga o i tatou le fanau i le silasila a le Atua.

TUSI FAITAU: Salamo 127

FESOASOANI MO FAIAOGA:

O le lona fa o tausaga o le nofoaiga a le tupu o Solomona na ia faia ai le malumalu o le Atua i Ierusalema. O se galuega tele ma e le faigofie, o le ala lea o le faapea o ana upu i lana pese lenei; “Afai e le atiinaa’e e le Alii le fale, e galulue fua o e atiina a’e, afai e le leoleo e le Alii le aai, e mataala fua o le na te leoleoina.” O le faailoga o le faalagolago o le tupu i lona Atua, e silafia e Solomona a le seanoa ma le Atua e le mafai e le tagata ona fai o se mea. Peitai, o le vaega lona lua o le salamo lenei, o loo taua ai le fanau, “Faauta, o le fanau o le tofi lea mai le Alii, o e ua fananau mai o le taui lea mai ia te ia.” O le upu tofi; o se matupalapala to mai, mai le Atua mo le tagata, o lona uiga o le alofa foai fua a le Atua mo le tagata.

O fanau la, o le meaalofa foai fua mai e le Atua mo matua, o le taui mai i le Atua. O lona uiga e le o se mea e pule ai se tagata. O le meaalofa ua ofo faatasi mai ma le alofa tunoa o le Atua. Na aumai ina ia tausii ma faapelepele e matua, ma ia toe ofo atu ina ia aoga le ola mo le Atua ma lona finagalo. Ua toatele matua, ua tuulafoa’i fanau, o nisi ua pei se mea fiafia le faatau ese atu o fanau. O nisi ua lafoa’i i le lapisi. A’o lea ua faamanatu mai le Salamo i le taua o fanau i le silasila a le Atua. Fai mai le fai salamo, “E pei o u fanafana i le lima o le toa, e faapea lava atalii o taulelea. Amuia le tagata ua tumu ai lana utu.” Soo se toa lava poo se tagata tau e faalagolago i le lelei o ana auupega poo mea tau, e pei o le tele o ana u. Ua faatusa i ai e le fai salamo fanau, e fana e le toa lana u na te silafia lelei le mea e tua ai, aemaise o ona fili e lamatia lona ola. Faapea foi fanau, o u i lima o matua o fanau, o lona uiga, e aputiputi ma faapelepele e ave i le aoga ma le faamoemoe, o le lumanai manuia lea mo aiga i le lumanai.

O le uiga atoa la o lenei Salamo, o mea uma lava, o meaalofa a le Atua i le soifua ma le ola o le tagata. O mea uma na tatou maua e oo lava i fanau, o le fa’aalia lava lea o le alofa tunoa tele o le Atua mo i tatou. O lau galuega faa faiaoga Aso Sa, o lou lea sao mo le ola faaleagaga o fanau. E te aoao i tala o le Tusi Paia, o loo e faauu ma faamaai le u, ina ia iloa e fanau tala i le ola, ma le Tala Lelei ia Iesu Keriso.

GALUEGA FAATINO: Tusiga Solo

1. Tusi sau solo i le ulutala “O FANAU”

2 Fuaiupu tai fa laina i le fuaiupu. E mafai foi ona ave i le fale e asiasi i le isi Aso Sa o lumanai. (Home Work). E lelei foi e fesoasoani i ai matua, ma toe faamanatu i ai le taua o fanau.

PESE: Tuli mai, tuli mai
Tuli mai, tuli mai
Tuli mai lau tama i le aoga lea ua fai
Aua le taofia, faamolemole tuli mai
Sei faitau o le PI, tauloto ma fesili
A E I O U F G L M N P S T ma le V

A’OA’OGA:

1. E alofa Iesu i tamaiti
2. O tamaiti o le meaalofo a le Atua mo tamā ma tinā.

MANATU TAIALA O NOVEMA: FAALOGO MA USITAI

O le faalogo ma usitai o nisi ia o auupega taua i le olaga o le tamaitiiti. O le ala lea i le lumanai manuia pe a faalogo ma usitai i matua, aua o le faia lava lea o le finagalo o le Atua. O le manatu taiala lea o lo o tata’i ai manatu o lenei masina aua le galuega faa-faiaoga.

ASO SA: 3 NOVEMA 20`19

MATAUPU: UA USITAI OREPA

SINI: Ia a’oa’o le vasega ina ia iloa ona ola usiusitai.

TUSI FAITAU: Ruta 1: 6 – 14

FESO ASOANI MO FAIAOGA:

O nisi nei o vaega taua i le soifuaga o so o se tamaitiiti po’o soo se tagata. O le faalogo ma le usitai, e o faatasi mea nei e lua, e le mafai lava ona alu le isi ae nofo le isi, e tatau lava ona o faatasi. O le talitonuga a lelei lau faalogo, e faigofie foi ona e usitai. O le tala masani lenei i le taumavaega a Naomi ma taitoalua o lana fanau. Ua oti Elimeleka lona toalua, ua feoti foi lana fanau tama e toalua, o Maalona ma Kilionā.

Ua oo foi le oge i le nuu o Moapi, ona manatu lea o Naomi e sili ai ona toe foi i lona nuu o Peteleema i Iuta, aua ua faamanuia i ai le Atua. O nisi o vaega taua i le tala sa tatou faitauina, o le faamanuia a Naomi ia Orepa ma Ruta.

Fuaiupu 8 & 9 Ona fai mai lea o Naomi i ava a ana tama e toalua. O ia oulua, ina foi atu taitasi i le aiga o lona tina, ia agalelei le Alii ia te oulua, pei ona faia e oulua i e ua oti atoa ma a'u, ia foi mai e le Alii ia te oulua ina ia maua e oulua le mapusaga taitoatasi i le aiga o lana tama. Ua sogi atu o ia ia te i laua, ona fetagisi ai lea o i latou ua leo tetele.

O upu faamanuia ia a Naomi, e manatu ai o le ala lea na faigofie ai ona matuu le finagalo o Orepa e toe foi i lona aiga. E le faapea ua tuulafoai e Orepa le tina o lona toalua, ae ua ia usitai, ma o se amataga fou foi lea mo ia ma lona ola tauatia'e. O le a se isi mea e manao iai, o lea ua faamanuia Naomi ia i laua.

Ioe tamaiti, ua usitai le teine o Orepa ia Naomi ina ia toe foi i lona aiga, e leai se isi nofoaga e sili nai lo le aiga, o le aiga o loo iai lou tofi ma lou faasinomaga. O le aiga e maua ai le fiafia ma le saolotoga.

Faapea foi tatou tamaiti, e leai se mea e sili nai lo le faalogo ma usitai, usitai i ou matua, o lau faifeau ma faiaoga ma tagata e matutua atu ia te oe. O le tamaitiiti usitai o le tamaitiiti manuia lena.

GALUEGA FAATINO: Taliga Fesili.

1. O ai le igoa o le toalua o Naomi?

Tali: O Elimeleka

2. O ai le igoa o le fanau e toalua a Naomi?

Tali: O Maalona ma Kitiona

3. O ai le igoa o le teine ma toe foi?

Tali: O Orepa

4. A'o ai le igoa o le teine na o pea ma Naomi?

Tali: O Ruta

5. O fea le nuu o Naomi?

Tali: O Peteleema Iuta

PESE: Faalogo ma Usita
E leai se isi ala
E fiafia ai Iesu
Na o le faalogo ma usitai

Tali: Galue ma faamaoni x 2
Fiafia ma olioli e te maua ai le tau
E aumai e Iesu, e aumai e Iesu,
Pe afai tatou te faalogo ma usitai.

A'OA'OGA:

1. E fiafia Iesu i le tama ma le teine e faalogo ma usitai.
2. Ia e usitai i lou tama ma lou tina.
3. Faalogo lelei i a'oa'oga mai le Tusi Paia.



UA USITAI OREPA MA TOE FOI

ASO SA: 10 Novema 2019

MATAUPU: UA LE FAALOGO IUTAIA

SINI: Ia a’oa’o le vasega o le lelei o lau faalogo e te malamalama ai ma usitai i le finagalo o Iesu.

TUSI FAITAU: Ioane 10: 31 – 39

FESOASOANI MO FAIAOGA:

O le isi lea faalogona o o tatou tino, e pei ona i ai faalogona e lima (5) o le pa’i (touch) sogisogi (smell) tofo (taste) vai (seen) faalogo (hear). A lelei lau faalogo, e faigofie foi ona e malamalama i se mataupu o loo talanoaina. E iloa gofie lava le tama mo le teine e lelei le faalogo i le mataupu o loo faamatala o le faiaoga aso sa, e uma fesili atu ae sau le tali e sa’o. Peitai, o se vaega o le ala lea na faitauina, o loo taumafai ai Iesu e faapupula i tagata Iutaia, le tasi o Ia ma lona Tama (Atonement) O lona uiga o le Atua o le Tolutasi, o Ia o le Tama, le Alo ma le Agaga Paia.

O le mataupu leni o loo saunoa ai Iesu i nisi o faataoto, ao nisi nei o mea o loo taumafai Iesu e faapupula ai o Ia ia Iutaia, o a’u o le faitotoa o mamoe o a’u o le leoleo mamoe. Fetalai Iesu o ana mamoe e latou te iloa lelei lona leo. E mulimuli atu foi ia te ia. O se e le talitonu, e le o sana mamoe. Ua faatusa e Iesu le tagata e faalogo ma fai lona finagalo i mamoe.

Peitai, ua avea le tele o a’oa’oga a Iesu ma galuega lelei ua ia faia, ua atili ai le maaa o loto o tagata Iutaia ma fia fetogi ai ia te ia i mea. Ana lelei la latou faalogo, e faigofie foi ona latou talia ma usitai i le finagalo o Iesu. Ae o le tagata lava ina a faamaualuga ma le fia alu ifo i lalo, o le ala lea ua fai mai ai le tatou mataupu. Ua le faalogo Iutaia. Ua le faalogo i a’oa’oga a Iesu, e a’oa’o atu Iesu ma faailoa atu o Ia ua auina mai e le Atua, o ia o le Alo o le Atua, ae feita ai ma tau fetogi ia Iesu i maa.

E ese le leaga pe afai tatou te le faalogo i le finagalo o Iesu, e tupu ai le faamaualuga ma le soli tulafono, o le ita fua i le isi au uso. E manaomia e Iesu ni tamaiti e faalogo ma usitai i lona finagalo. O le tamaitiiti lene e fia faauo iai Iesu.

GALUEGA FAATINO: Saili mai upu nei i totonu o le paso?

1. LEOLEOMAMOE
2. FAALOGO
3. USITAI
4. IESU
5. MAMOE

T	L	F	S	O	F	F	U	G	L	A
L	K	A	H	T	A	I	S	L	G	E
P	N	A	E	I	I	H	I	M	G	I
M	O	L	V	L	T	H	T	A	T	I
L	E	O	L	E	O	M	A	M	O	E
S	I	G	G	M	T	F	I	E	S	U
A	R	O	T	S	O	S	H	H	H	S
N	H	S	V	M	A	M	O	E	I	M

PESE: Pese ma Viiga 181 (fuaiupu 1 & 4)

A’OA’OGA:

1. Faalogo ma usitai i matua
2. E leaga le faa taliga tuli
3. Ia lelei lau faalogo i tala e uiga ia Iesu.

ASO SA: 17 Novema 2019

MATAUPU: UA FAIA LE TUPUA AURO

SINI: Ia a’oa’o le vasega ina ia malamalama, o le le faalogo ma le le usitai o Isaraelu i le Atua, na mafua ai ona latou faia le tamai povi auro ma ifo i ai.

TUSI FAITAU: Esoto 32: 1 – 10

FESOASOANI MO FAIAOGA:

O loo fesagai Mose ma le Atua o Isaraelu i luga o le mauga o Sinai, e tuuina mai ai papa ma’a ua tusia ai e le nuu o le Atua tulafono e lima taitaiina ai le soifua o lona nuu, ae faasaga ifo Isaraelu ma Arona fai le tamai povi auro ua ifo i ai.

O uiga lava ia o Isaraelu, e le o ni tagata e tumau lo latou talitonu i lo latou Atua. Fai mai ua latou iloa ua faatuatuai ona alu ifo o Mose, e atagia mai ai o ni tagata e le lava onosai, e le faatalitali ma le loto talitonu. Ia lea ua avea le tamai povi auro, o le mea e mate e leai se ola ae ua fai mai ua sisiva ma ifoifo ma ua fai taulaga i ai. Ua oo a ina faapea ane o lo latou atua lea ua

aveina a'e i latou mai Aikukpito o le mea sa nofo pologa ai. O uiga ia e oo ifo i le tagata e le faalogo ma le usitai i le Atua. E faapogisaina loto i mea lelei, ae tupu a'e le loto faamaualuga ma le fia talitonu i le Atua.

O le tupua, o se mea e sili ona inosia e le Atua, aua ua uma ona osi le la feagaiga ma lona nuu. E fai o Ia ma o latou Atua, ae fai i latou ma ona nuu. E tiga le finagalo o le Atua pe a o ese Isaraelu ma ifo atu i tupua po o se isi lava Atua. Tamaiti, e alofa le Atua i le tamaitiiti e faalogo ma usitai i lona finagalo, ma usitai i ona matua ma tagata matutua. O tupua, o mea e te tuinanau na ua e faasili ae ua e faamulimuli ma le amanaia le Atua, o le Atua o Ia e lavea'i ma faaola i tatou.

GALUEGA FAATINO:

Ia faatino le talai mai le alu ese o Mose ma le la fesagaiga ma le Atua, ma le tupua auro na fai e Arona ma le nuu ma ifo i ai.


PESE:

1. Ua fai e Isaraelu
O le tamai povi auro
Ua ifo iai, ma fai taulaga
Aue! Tainoino pei o se mala
2. E le fiafia le Atua
I le tagata ifo i tupua
E alofa le Atua i le tamaitiiti
E muamua ia te ia le Alii

(June: Iesu alofa i tamaiti, tamaiti uma o le lalolagi)

A'OA'OGA:

1. E le fiafia le Atua i le ifo i tupua
2. Faalogo ma usitai i le Atua
3. E le lelei le tama ma le teine ae le faalogo i ona matua.



O LE TUPUA AURO

ASO SA: 24 Novema 2019

MATAUPU: USITAI LE MATAGI MA LE VAI

SINI: Ia a’oa’o le vasega ina ia iloa ma malamalama e le na o le tagata e usitai i le finagalo o Iesu, e oo lava foi i mea o le natura poo le foafoaga, e usitai uma lava i le finagalo o Iesu.

TUSI FAITAU: Mataio 8: 23 – 27

FESOASOANI MO FAIAOGA:

O se tasi lenei o vavega na faia e Iesu, ua matua ofo ai lona ausoo mo e ua latou molimauina. Fai mai a’o alu le malaga a Iesu ma ona soo i le po e kolosi le vai o Kalilaia sa tofa Iesu i le vaa, peitai ua osofaia i latou i le afa tele ma na tali goto ai lo latou vaa.

Ua o ifo le au so’o ma fafagu ia te ia a’o tofa (moe). Le Alii e, faaola mai, a matou fano. O le augani a le au so’o e iloa ai, o le afa tele, ma ua uma le poto faale-tagata, ua lagona le vaivai. Ua ala a’e Iesu, ona fetalai atu lea ia te i latou, se a le mea ua outou matata’u ai, outou e faatuatua itiiti. Ua leva ona mafuta Iesu ma ona so’o, ma ua latou faalogo so’o i a’oa’oga ma vaavaai i a’oa’oga e faia e Iesu, peitai, latou te le faatuatua lava.

O lenei mataupu o loo aumai ai o le le faalogo o le auso’o i a’oa’oga ma Tala Lelei a Iesu, ae ua faalogo ma usitai le matagi ma le vai o mea e leai ni taliga e a’oa’oina ai le faalogo ma le usitai a ona so’o. Na ona vavao lava e Iesu i le matagi ma le vai. Fai mai ona tele ai lea o le malū. Ua taufaifo tagata ma faapea ane, pe se a le ugia o lenei tagata, aua ua usiusitai ia te ia le matagi ma le vai.

O nisi nei o mea o le natura a oo ina maemaea e iu ai lava ina fano ai le ola o le tagata. Peitai, o le fetalaiaga lava a Iesu na usiusitai ai le matagi ma le vai. Ioe, faapefea la ona usiusitai o nei mea e leai ni taliga e faalogo ai, a’o tatou o loo tatou faalogo pea i a’oa’oga a Iesu ae tatou te le fia usiusitai. O le autu o lenei masina. “Faalogo ma Usitai” Ia matua lelei la tatou faalogo aua a lelei lau faalogo i le a’oa’o atu a ou matua, e faigofie ona e usitai ma talia, faapena foi lau faalogo i a’oa’oga a le Tusi Paia, o loo fai atu e le faifeau ma faiaoga Aso Sa i lea Aso Sa ma lea Aso Sa. O le tama ma le teine e faalogo ma usitai, o le tamaitiiti manuia lena ma alofagia e le Atua atoa ma tagata.

GALUEGA FAATINO:

Ia faatino le tala e pei ona iai le vavega sa faitauina. Ia atagia ai le fetalaiga a Iesu, “Ia faatuatua e mafai ai ona fai o vavega.”

PESE: Folau i luga o le vasa i lona alofa

A’OA’OGA:

1. Ia faatuatua i tatou ia Iesu
2. E usiusitai mea uma ia Iesu
3. O Iesu o ia o le fai vavega
4. Toaga e tatalo ia Iesu e manuia ai o tatou olaga



UA USITAI LE MATAGI MA LE VAI

MANATU TAIALA O TESEMA: UA OO MAI LE FAAOLATAGA.

O le masina lenei e faamanatuina ai le fanau mai o le pepe o le Kerisimasi. O le pepe lava o le faaolataga mo le lalolagi atoa. O le faaolataga ua agavaa uma ai tagata uma i le ola e faavavau e ala i le salmo ma faatuatua faamaoni i le Atua. Aua o le lalolagi ua tumu i le agasala, a ua ia aumaia lona alo e toatasi ina ia le fano lava se tasi e faatuatua ia te ia, a ia maua le ola e faavavau.

ASO SA: 1 Tesema 2019

MATAUPU: SAKARIA LE OSITaulAGA

SINI: Ia a’oa’oina le vasega ina ia malamalama o le valaauina o Sakaria o le ositaulaga, o lona faamaoni i lona valaauina na mafua ai ona faamanuia i ai le Atua mo le maua ai se tama tane.

TUSI FAITAU: Luka 1: 1 – 13

FESOASOANI MO FAIAOGA:

O le faiva po o le galuega lea faaositaulaga i le Feagaiga Tuai, e na o Arona ma tagata na tupuga mai ia Arona latou te faatinoina. E 24 vaega sa vaevaeina iai le au ositaulaga, ma e auauai tai vaiaso i le malumalu e osi ai taulaga. E na o le toatasi le ositaulaga e filifili e alu e faamu mea manogi i totonu o le vaega e ta’u o le vaega paia i totonu o le malumalu, o iina e afio ifo ai le Atua ma faailoa mai ai lona finagalo i lona nuu.

O Sakaria, o ia o se tasi o le aiga o Arona, sa i lalo o le taitaiga a le ositaulaga o Avia. O lona toalua o Elisapeta o le aiga foi o Arona. Fai mai sa amiotonu i laua i luma o le Atua, sa auauna ma le faamaoni i lo la Atua. Peitai, e leai se la tama, ma o se faanoanoaga lea ia i laua, i aso uma. Ae o se la manao faifaipea i le Atua e tatalo ai ma tau i le Atua e fia maua se la tama. Ua matutua Sakaria ma Elisapeta, ua pasi foi ma le taimi e maua ai se tama. Peitai, fai mai ua oo i le tasi aso ona tofia lea o Sakaria e alu i totonu o le vaega paia o loo i ai le fale faitaulaga e faamu ai mea manogi.

O iina na vaai ai Sakaria i le agelu a le Atua o loo tu i le itu taumatau o le fata faitaulaga. Ua ia iloa le agelu ona atuavale lea ma ua fefe. Peitai, o iina na faailoa ai e le agelu le finagalo o le Atua. Ua faamanuiaina ma ua faafogaina e le Atua le laua tatalo. O le a fanau e lana ava o Elisapeta se tama tane e faaigoa foi ia te ia o Ioane. Ua tali mai le Atua i le tatalo a lana auauna, ma o le uiga foi lea o le igoa Sakaria, “E manatua e le Atua.” E le galo i le Atua manaoga o lana fanau e ole atu ma le faatuatua ia te ia. O Ioane ua na o ia o le papatiso, o ia o le teuteu ala, na

muamua mai e tapena loto ma agaga o tagata mo le afio mai o le pepe o le faaolataga, le Mesia na valoia, o le faaola o le lalolagi o Iesu.

GALUEGA FAATINO: Taliga Fesili

1. O ai le igoa o le ositaulaga?

Tali: O Sakaria

2. O ai le igoa o le toalua o Sakaria?

Tali: O Elisapeta

3. Aisea na faamanuia ai le Atua ia Sakaria ma Elisapeta?

Tali: Ona o le amiotonu ma le faamaoni i le Atua e alai le tofi o le ositaulaga.

4. O ai le igoa ole a faaigoa ai le la tama?

Tali: O Ioane

5. O a ni lagona na oo ia Sakaria ma Elisapeta ina ua leai se la tama?

Tali: E osi le taulaga i le Atua.

PESE: CAST YOUR BURDEN

Cast your burden unto Jesus

Tuu au avega ia Iesu

For He cares for you

E alofa ia te oe

For He cares for you

E alofa ia te oe

Higher x8

Luga x8

Lift Jesus higher

Siitia Iesu i luga

Lower x8

Lalo x 8

Stomp Satan lower

Soli Satani i lalo

Come to Jesus my mother etc.

Sau ia Iesu, lo'u Tina

Come to Jesus my father etc.

Sau ia Iesu, lo'u Tama

Come to Jesus my sister etc.

Sau ia Iesu, lo'u uso

Come to Jesus my friend etc.

Sau ia Iesu, la'u uo

A'OA'OGA:

1. E faamanuia le Atua i le tagata faamaoni

2. O Sakaria o le ositaulaga lelei.
3. Ia faamaoni ma toaga i le aoga.



SAKARIA MA LE AGELU

ASO SA: 8 Tesema 2019

MATAUPU: O MARIA MA LE TAUPOU

SINI: Ia a’oa’oina le vasega ina ia malamalama i le uiga o le upu taupou, ma toe faamanatu o Maria o le tina o Iesu Keriso i le faaola o le lalolagi.

TUSI FAITAU: Mataio 1: 18 – 23

FESOASOANI MO FAIAOGA:

O le upu taupou, i le aganuu a Samoa, o se tamaitai e lei faia sona aiga (toalua), e tele le taua o le tiute o le taupou i totonu o aiga ma nuu, o i latou e paluina le ava pe a fesagai nuu ma ni malo, e le pule lava ia i ana mea e fai, o le taupou e vaavaai tele, o le ala lea a oo ina tofale se tamaitai e lei faia sona toalua, e faasala e le nuu, aua foi ua faoa le mamalu, sa faamamalu ai e lona aiga ma le nuu.

Sa faapena foi le tamaitai o Maria, e ui sa ia faufautane pe sa manao ia Iosefa e fai ma ona toalua, peitai o ia lava o le taupou. E atagia mai i le molimau a Mataio, o le taimi lea o loo feoai Iosefa ma Maria e lei nonofo lea ua faamanuia ai o ia, i le to, o le to lava mai le Agaga Paia. O Maria o ia lava o le tamaitai na filifilia e le pule tutasi ma le pule aoao a le Atua e ala mai ai lana faaolataga. O lagona faaletagata o Iosefa na ia faapea ane ai ma manatunatu i lona loto, e na te le faamaasiasi ia Maria i luma o tagata o le a ia faatea lemu, o lona uiga o le a taumafai e faagalologo, aua o mea faapenei o se luma i se aiga. Peitai ao manatunatu Iosefa, ae fa’aali mai loa ma le agelu a le Alii i le miti, ua faapea mai: Iosefa e, le atalii o Tavita, aua e te fefe ina au mai ia te oe o Maria lau ava, aua o lana to mai le Agaga Paia.

E fanau mai e ia le tama tane, e te faaigoa foi ia te ia o Iesu, o le uiga o le igoa o Iesu: O le Faaola, aua e faaola e ia lona nuu ai a latou agasala. O i foi lea ua taunuu ai le valoaga a le perofeta o Isaia. “Faauta e to le taupou ma fanau mai le tama tane latou te faaigoa foi ia te ia o Emanuelu o lona uiga: Ua ia te i tatou le Atua. Na filifilia e le Atua Maria ma Iosefa ona o tagata loto maulalo, o tagata amiotonu e ala mai ai lana faaolataga i le lalolagi. O Maria o le tina o Iesu, o le pepe o le Kerisimasi, o le faaola o le lalolagi. O le taupou o le faailoga o le mama (purity)

GALUEGA FAATINO: Faatino le tala

PESE: Vivii lou loto i le Alii (Pese a Maria le taupou)

A'OA'OGA:

1. E manao le Atua ia ola mama lana fanau.
2. O Maria o le tina o Iesu
3. O Iesu o ia o le Faaola mo tagata uma.



O MARIA LE TAUPOU

ASO SA: 15 Tesema 2019

MATAUPU: TALA O LE OLIOLI

SINI: Ia a’oa’oina le vasega ina ia iloa o le tala o le olioli, o le tala i le pepe o le Kerisimasi, o le Faaolataga ua faia e le Atua mo le lalolagi agasala e ala i lona Alo Pele o Iesu Keriso.

TUSI FAITAU: Luka 2: 8 – 14

FESOASOANI MO FAIAOGA:

Ua tele mau tala ua tatou faalogo ai i nisi aso, o tala o mea o tutupu i lea itu ma lea itu o le atunuu faapea ai foi ma le lalolagi atoa. Peitai o le tala lea sa tatou faitauina o le Tala Lelei o le olioli, ina ua iloa e leoleo mamoe o le pupula o le Alii ua faataaliolio i o latou luga. Fai mai ua matua fefefe ai i latou, ona faapea mai lea o le agelu a le Alii. “Aua tou te matatau, aua faauta, ou te aumai ia te outou le Tala Lelei o le olioli tele e oo mai i le nuu uma, aua o le aso nei ua fanau ai ia te outou i le aai o Tavita le Faaola, o ia o Keriso le Alii. O le faailoga lenei ia te outou, e iloa e outou le tamameamea ua aui i le ie, o loo taoto i le fale manu.

Ioe, e tele tala mananaia, peitai o le tala sili lenei, o le tala i le pepe o le Faaolataga, ua fanau Iesu, o Ia na Afio mai e Faaola ma lavea’i i tatou mai a tatou agasala. O se tala fiafia mo i latou sa leoleo mamoe i lea po malulu. O le tala o le olioli ina ua tapenaina e le Atua le faaolataga mo i tatou o lana fanau.


O lea o le a tatou aga atu i le faamanatuina o le Kerisimasi. O le faamanatuina o le aso na soifua mai ai Iesu Keriso le uo sili a tamaiti. Tatou sauni e faamanatu fiafia ma faaeteete i tatou tamaiti aua o se vaitau foi e tele ina tutupu ai faalavelave ona ua ese le faamamafa a nisi tagata, o le tala o le Kerisimasi o le tala lava ia o le olioli ae le avea ma mea tatou te faanoanoa ai ona o ni faalavelave tutupu faafuasei ia i tatou. Manuia le Kerisimasi ma le alo atu i lona tausaga fou.

GALUEGA FAATINO: Faatino le vaaiga o le Kerisimasi.

PESE: Pese maViiga 34

A’OA’OGA:

1. Ia tatou fiafia ma olioli ua fanau mai Iesu
2. O Iesu o le pepe o le Faaolataga
3. Ia manuia le Kerisimasi ma le Tausaga Fou.



UA FANAU IESU I LE FALE O MANU
